

龍游縣志

壬午年重刊

ル 5
3136
1



門 5
號 3136
卷 1

重刊龍游縣志序

歲辛巳冬余重刊衢郡志苦舊
本多錯謫殘缺蒐輯屬邑志乘
參閱攷据惟西安江山有志常
山開化及龍游三邑其乘缺如

昭和十四年
六月二十一日
購求

為悵惘者久之因商各屬令纂
修適龍邑余鏡波觀察自粵東
解組歸晤叙此舉慨然有復古
心始商陳寶巖大令延邑紳勸
捐助贊纂修尚未集事鏡波觀

察意以事務所先仍舊急於圖
新隨函商其令姪今安順府知
府子春太守捐贊倡刻舊本與
余重刊郡志意見相合閱數月
縣志與郡志先後工竣不勝欣

然余竊謂輿圖之攷通志括其
成大概本於省志郡志其究摘
要於縣志居多兵燹後典籍半
即銷沈志乘板歸烏有脫無振
作者經理其間任舊志終於泯


滅將來採擇所及其不追咎於
今日也幾何鏡波觀察本文章
宿學為政數十年所至有循聲
現屆杖國之年致仕歸田猶殷
殷為文獻主持子春太守則曾

與同官比部素景其行誼今果
慷慨嚮義足成乃叔志兩君子
興復如是微特功在繼往即他
日邑志增修未嘗不快然於領
袖之挈基址之憑也余於是欽

服其人書之以為慨然復古者
勸至於蒐羅補輯續纂新編是
所望於賢大令及邑諸紳共成
義舉云
光緒八年歲在壬午季春之月

儘先補用道知衢州府事前
京畿道監察御史安陸劉國

光撰



重刊志書序

吾邑志書由來舊已自康熙迄
乾隆初年賢邑宰盧公暨徐公
捐廉相繼倡修時則鄉先達余
岫雲太史喬梓先後協同採輯

手訂成編固文獻之盛亦牧令
之賢也藏板未及百年字畫已
多漫漶篇頁亦多殘缺迨咸豐
八年以後髮匪蹂躪嗣復佔踞
縣城幾及三載四鄉民居半遭

焚劫而本城尤甚所有房屋什
物一劫於匪再燬於兵非特舊
板無存即家藏志書大多散失
夫以一邑事蹟曠隔至百數十
年之久加以匪氛滋擾廬舍蕩

然故老無存所有官司選舉節
義等項及早蒐羅採訪已大懼
荒渺無稽則續纂萬不可緩然
即搜求舊本其完善者已十不
得一則鳩工重梓事在所先如

昔日有見聞未及採訪未周儘
可俟續纂集中補載而原志應
概仍其舊時堂姪撰服官黔省
與城鄉諸紳董郵寄函商均無
間言爰付之剞劂氏重梓

省

光緒八年歲次壬午季春月上

浣之吉邑人余恩鏞題於柯

城之寓廬



原序

國家混一區夏垂三十載車

書尉候悉主悉臣方內晏

然靡有鳴桴擊柝之警於

是

天子思一道德同風俗乃詔
天下郡邑各以其志上丞
相府將講求風土政教所
宜斟酌損益以爲久安長
治之道而吾邑漢中許侯

加意民瘼奉行尤恪爰屬
學博樵李黃君暨邑中諸
君子共事編纂而予亦執
簡其後相與公聽並觀網
羅延訪叅伍折衷務歸至

當視草於壬子之冬輟簡
於癸丑之夏哀輯旣成迺
以請質於侯而侯復命予
序之龍之有志前此莫考
自明天順間宏農王侯爲

志而宏治間六合袁侯繼
之因陋就簡頗病於質至
萬厯間南昌涂侯重修時
邑中余東衢童子鳴兩君
有盛名叅酌互定其書遂

稍稍雅馴又四十年豫章
萬侯屬曹君肖蒙重修萬
侯以謝事有日督促成書
不無舛漏今所謂壬子志
者也距今修志又屆壬子

蓋六十年於茲矣六十年
之間盛衰登耗沿革興廢
叅錯不齊何事蔑有其在
今日苟欲傳信徵實以詔
後人志誠有不可不修者

顧子俛仰六十年間而深
嘆吾邑之日敝也吾邑在
一郡中最爲瘠土無深山
大澤土膏陸海之饒無金
錫織縞齒革羽毛之利然

往在勝國未造南服粗安
吾邑閭閻熙穰烟火和樂
家家力穡服賈足以自給
故勇於急公篤於好義絃
誦之聲琅琅相接無不思

奮跡策名致身通顯而比
年以來生齒凋耗積貯鮮
少民無儋石之儲士有襟
肘之嘆憂愁噍殺困頓無
聊較之疇昔固已若易地
而居越都而治矣何今古
之不相及至此也論者疑
革命之際時會使然而不
思吾邑自出湯火登衽席
涵濡浸漬於

朝之化者固亦以久也害
氣旣究由孽宜蘇而痾瘵
呻吟未聞起色若此者豈
得盡歸於喪亂之餘流離
蕩析之故歟毋亦爲治者
簿書期會之是亟徵發供
億之是煩皇皇然彌縫匡
救日有不暇而於風土習
尚制治更化之源流顧忽
焉而未之講也方今

天子嘉惠元元德音屢沛廣
廈細旃之上懼不能周知
疾苦而取天下志秉以資
省覽固遠不同於前此守
土之臣自爲排纂無闕體
要也而吾邑之修又適當
六十年之會韓昌黎有言
十日十二子相配數窮六
十其將復平殆今日之會
矣剝極而復否終而泰天

時人事有固然者矧許侯
以廉明慈惠之資體

九

重懷保之意披圖按籍朝
夕咨諏必有與利不憚煩
而除弊不厭盡者休息愛


養生聚教訓方且移風易
俗以底熙皞之隆甯僅如
六十年前倉廩衣食粗足
自給云爾哉予不敏獲隨
諸君子之末綯後之人沐

其流風溯其遺澤謂吾邑
戶口之殷賑風俗之醇茂
政教之修明人物之炳蔚
咸自今日修誌始則予所
竊幸以附不朽者也是爲

序

昔

康熙十二年歲次癸丑陽
月上浣之吉邑人余恂
題於敦夙堂



原序

今人一行作吏日汨首簿書期
 會經世之業詎復闕胷臆間卽
 有有志之士往往以文法趣數
 置勿暇及夫務有可緩而實亟
 效有不在旦夕而在百年莫踰

志乘考亭出守南康下車首問
邑志蓋誠有見於經世之大也

今

天子右文稽古下令蒐輯將彙而
登之副在尚書職方之紀一統
之盛粲若列眉俾史臣執筆而

事纂述皆有所考据焉



詔甫下兵事作所在負干櫓急儲
胥或皮閣下間或半途中輟迄
今未底於明備有識者屢形之
簡牘龍邱大令盧惟庵先生捧
檄是邦旣取其蟲沙風鶴之遺

黎而祗席之卽謀邑志父老歷
堦而進曰邑故有志久殘齧鄉
先達余宮諭岫雲先生博聞彊
記哀述垂就而遽歸道山是足
備采錄也先生就其家出其遺
編禮進鴻碩之儒分曹讐訂而
以己意斷定成書爲卷若干出
奉錢授之剗剗走一介會城以
書見示且屬爲之序余讀之進
退剛嚴而不失忠厚之指援据
詳贍而要以奉國憲敦天彝勤
勤懇懇反覆告誡治亂消長之

機忠孝節義之槩顯顯於心目
昔荆公欲以國史屬東坡力謝
弗逮微先生之學之識惡能成
茲不朽盛事哉余起家慎陽百
里墟莽士子至裂書楮掩背呂
百年來掌故無足傲者踵事成
編有志未遂余於是益嘆惟庵
先生學術經術芻勿可幾及已

尚

大清康熙十有九年歲在庚申
夏五月隣治年家弟顧豹文
頓首題於願圃之緝字樓



原序

車書一統之盛尉侯萬里之
遙匪人勿傳靡國勿紀洵鉅
典也

國家撫有區夏定鼎齊州玉燭

核序
咸調璇圖同耀

天子明鑒遐荒詔郡邑以誌進我
龍以列服一星彈丸尺土山
城習尚不識繁華遺俗流傳
猶沿樸茂從風順則僅喻尊
親樂善右文咸知禮讓漢中
許侯留心民隱頗厭舊聞文
獻齊徵降心延訪吾邑太史
余岫雲先生適丁恬退賁跡
邛園分藜火之餘輝為珥華

之領袖覆校推揚條分井然
較諸前志庶曰精詳垂厥後
賢永為衡鑑嗟乎是役也業
犁然脫葉於壬子之歲忽倉
黃輟筆於風鶴之辰太史復

歸道山藏書遂同韞櫝幸免
水火式觀汗青厥惟興京盧
侯是賴焉我矣長才大略義
問仁心始以攝篆領干城繼
巨今符膺司牧試虞既彰盤

錯之能借寇遂邀甘棠之蔭
作百子之堰溉我田疇有同
鄴豹新三鱣之堂教我子弟
不讓文翁禁溺則婉孌是有
人稱賈父之兒去錮則伉儷
克諧家絕盧仝之婢臣至備
文昌之橋建城隍之廟而神
人胥罔怨恫核荒熟之糧正
疆理之界而家國俱蒙樂利
是皆前太史備著于簡端有

志而未逮今仁侯盡見諸行
事無美而弗臻是宜悉舉以
特書庶幾良法之永式則又
藉我沂公美贊仁侯善繼先
志補遺蒐軼踵事增書可擬

左氏之後經欲過褚生之續
史仁侯出庶俸以剗刷沂公
殫精力以校讐無愧三長可
俟百世余當太史在時氣盡
大巫已同游夏之莫贊今值

盧侯涖治身居遠宦即添塵
露以何由惟是先後賢侯之
懿烈宜彰大小許公之鴻裁
難泯九鼎本重何資季路片
言三都已成甯假士安一序
嘉孫公之直筆竊附芻蕘榮
楊子之列名敬攜琬琰云爾
康熙辛酉仲春上浣邑人楊昶
題於合浦官舍



龍游縣誌卷之首

縣誌圖目

周禮士訓氏掌四方地圖凡輿地大概披圖斯見故縣境以下諸圖並列之篇

縣境圖

縣城圖

縣治圖

學宮圖

龍邱十二景圖

舊誌有八景圖各山古跡多有未備今增定為十二景圖

南至處州府



北至嚴州府



昌縣界十九里






壽昌縣十六里

東至金華府湯溪縣四十里

西至衢州府西安縣七十里








文星

湖



湖西



西


照牆行路地長十一
 弓二分橫二十四弓
 積二百六十八弓八
 分計二畝一分二厘
 ○內湖長三十五弓
 二分橫二十四弓積
 八百四十四弓八分
 計三畝五分二厘○
 外湖長七十六弓八
 分橫三十七弓九分
 二厘積二千九百十
 二弓二分計一十二
 畝一分三厘四毫




翠巖春雨

西湖柳浪






雙橋明月




石壁漁舟









東山紅樹







十
鳳渚歸帆




風晴水澱





岑山霽雪






大善山齋

二



烏石飛泉

十四



九峯仙窟





牙屏松磴



纂修姓氏

主修

文林郎知龍游縣事盧

燦惟庵遼東海城人

賜進士出身左春坊左諭德兼翰林院修撰余

恂岫雲本邑人

協修

賜進士出身龍游縣原任知縣許

瑄嚴思陝西城固人

龍游縣儒學原任教諭黃

濤符禹嘉興人

龍游縣儒學教

諭楊鼎新晶園慈谿人

龍游縣儒學訓導王克遵

三侯錢塘人

賜進士出身廣東合浦縣知縣楊

昶浩本邑人

貢 生葉盛芳菊亭西安人

余際熙孔初本邑人

葉 榮文若本邑人

余 忱芥菴本邑人

祝之瑤子玉本邑人

余 勉公本邑人

生 員毛鳳飛千本邑人

葉 渠文本邑人

龍游縣志凡例

一舊志載輿地建置祠祀田賦風俗官師選舉人物藝文雜識凡十目其山川水利即附見輿地中頗覺大畧今以山川水利增為十二目蓋山川為一邑名勝紀載宜詳而水利農事所重有宜興復者附以臆斷尤不容或畧也

一舊志輿地建置後即載祠祀今以一邑所重首在官師而官師所急莫先田賦故先繼以官師田賦而後以山川水利祠祀風俗依次相從稍

權緩急以分先後非敢變易前人也

一舊志各類詩文俱載藝文中今閱所載詩文多半爲山川祠廟而發若總彙在後則緝閱爲難今一一散附各類下以便省覽至於詩文中古昔名賢鴻文佳什可以傳後而無所附麗者則仍入藝文中不忍竟令湮沒也

一舊志所載山川止依次總序畧紀道里遠近其名勝風景絕無表章今既照舊志以通邑山川源委總序於前而復擇其最著者散見於後畧

綴數語彷彿一二以誌其勝且即以詩文附見下方庶使一邑山川梗槩開卷燦然不致黯黹無色也

一舊志所載人物自唐以上總稱先賢沐宋以下始分各類今思一邑之中人物有限勉強分析彌覺寥寥且理學事功文章德業中有相兼尤難析置今槩合而一之悉以年代爲序至於武職孝行列女方技等類事蹟原自判然則依照舊志依類相從以附於後

一舊志所載人物前賢業已採入一一如舊登載
 不敢逞臆妄刪以附於從厚之道其有事蹟未
 甚詳備詞句未甚雅馴者則重加增潤以成全
 璧至於後來所增人物悉皆博咨詳考恐蹈失
 實甯嚴毋寬若其聞見狹隘搜訪未周或有遺
 珠在所不免博雅君子正不妨從容補輯也

龍游縣誌目錄

卷一

輿地

卷二

建置

卷三

官師

卷四

田賦

附物產

卷五

山川

卷六

水利

卷七

祠祀

卷八

風俗

卷九

選舉

卷十

人物

卷十一

藝文

卷十二

雜識

龍游縣志卷之一

海城盧燦惟庵重修

龍邱余恂岫雲纂輯

男勉汧公較閱

輿地誌

誌郡邑者必首輿地非徒辨廣輪定疆界而已食貨財用于是乎出貢賦賓祭於是乎其戶口齒籍于是乎盛聲名文物于是乎輿故曰地者萬物之祖也龍游古姑篾地為越西鄙彬雅煥郁埒于中

邦非地誰麗哉誌輿地第一

分野

龍游爲衢州支邑當越會稽之分其域楊州春秋元命苞曰統爲楊州分爲越左氏傳曰越得星紀斗牛二宿史記曰南斗牽牛吳越之分也漢書曰越地牽牛婺女之分野後漢書曰自斗十二度至須女七度又曰會稽王以丁巳日占玉衡之色吳志曰會稽上應牽牛之宿下當少陽之位晉隋與後漢同唐書曰得婺女比於星紀與吳越同占宋史曰會稽上應天

市垣第六星宋中興天文志曰自南斗十二度至須女七度爲星紀于辰在丑吳越之分野屬楊州元史曰斗四度三十六分六十六抄入吳越之分明清類天文志曰兩浙當南斗須女之分通志曰會稽入牛一度又曰女宿十二度十六星鄭北一星曰越通考曰北斗第四星四權王吳越分星經曰玉衡第六星王楊州又曰南斗第二星王會稽又曰五星火曰熒惑屬越又曰畢口五星南一星王越又曰三台上台下星王楊蔡汝楠天文畧曰十二次楊州丑分星紀

之次衢州自牛五度至女一度

舊誌童珮曰按女本元楞之次非丑也班

志雖以牽牛婺女主越而又以會稽隸吳王南斗不係牛越主牛女不係斗至范書亦然似失實唐一行以州土分屬會稽入牛一度至五度衢隸會稽位當其次歐陽修唐書以星紀南斗九度終女四度而以牛為越分乃不言女統于牛也但遺斗三度而過女三度耳皆所未詳元授時麻曰女一度尚在丑二度始入子明清類分野書曰衢自牛五度至女三度此為得據也

沿革

夏禹貢為揚州之域帝少康封庶子無餘于越遂為越地

商揚州之域

周姑蔑國子爵越附庸也

春秋哀公十三年六月丙子越伐吳吳王孫彌庸壽

于姚自泓上觀之彌庸見姑蔑之旗曰吾父之旗也無北至干禦兒東至于鄞西至于姑蔑路史國名記曰姑蔑一名姑妹太末也晉之龍邱今之龍游有姑蔑城

秦制天下為三十六郡立太末縣屬會稽

孟康曰太音闔

漢高祖置郡國武帝制十三刺史郡縣如故新莽改

太末為末治

漢書地理誌曰會稽太末有澱水東北至錢塘入海輿地誌曰太末又曰太蔑

水經曰浙江東至錢塘澱水入焉源出太末

東漢獻帝初平三年分立新安縣建安四年孫權所

新安置豐安縣並屬會稽二十三年析太末地立平

昌縣

吳主皓寶鼎元年以會稽隸東陽改太末為龍邛後漢

書東陽記載龍邛山有九石特秀林表色丹白遠望如蓮花龍邛萇隱于此因名

晉武帝太康元年平吳分天下為十二州東陽郡隸

楊州縣仍復為太末隸東陽

宋隸東陽

齊隸東陽

梁隸東陽

陳隸東陽

隋文帝開皇九年平陳省太末豐安入吳甯縣廢東

陽置婺州地屬婺州

唐高祖武德四年置澱州又析置太末白石二縣後漢

書曰白石山之南先是有圓石聳二十餘丈方士趙炳過而呵之石半折碎者色皆白八年廢

澱州省太末白石入信安縣仍隸婺州太宗貞觀八

年析信安金華二縣復置龍邛武后垂拱二年分信

安龍邛常山三縣置衢州縣隸之如意元年析縣地

置盈川縣證聖二年析地置武安縣中宗神龍元年

勅天下州縣自天授以來改武字並從舊省武安代
宗大曆十一年升龍邱縣為緊縣憲宗元和七年省
盈川

後唐明宗長興二年吳越王錢鏐以邱為墓不祥改
龍邱為龍游

宋隸衢州徽宗宣和四年詔天下郡縣有龍字者皆
避之改龍游縣為盈川縣高宗紹興元年詔復為龍
游

元世祖至元十三年改衢州路隸江浙行省縣仍屬
之二十一年以江浙行省為江浙等處行中書省縣
仍屬衢隸之

明太祖壬寅歲改衢州府為龍游府縣隸之丁未尋
復為衢州府縣仍舊洪武九年立浙江等處承宣布
政使司以衢州府縣為屬編戶二百一十五里憲宗
成化七年析縣之清陽鄉入金華置湯溪縣省戶二
十一里縣實編戶一百八十四里

國朝仍為龍游縣屬浙江衢州府

疆域

治東至金華府湯溪縣界五十里南至處州府遂昌縣界九十里西至本府西安縣界三十里北至嚴州府壽昌縣界六十五里東南至遂昌縣界六十里西南至西安縣界四十里東北至蘭谿縣界四十里西北至西安縣界五十五里自縣治去 京師四千五百里有奇省城五百里府治七十里 鄉一十有一都三十有八圖一百八十有四

立德鄉

舊里六新甯齊明依仁延祚光明昭陽

一都

附郭圖十坊十有五縣前旌忠石橋市北龍頭城角義井文昌學前西門青雲阜甯東華

廣進六都

圖二在縣北門南十里

太平鄉

舊里八敦愛太平康甯孝順清陽昭義懷賢招賢

二都

舊圖二今改圖一在縣西五里 五都 圖三在縣西十里 十一都 圖一在縣南十里

五里

太二十九都 舊圖四今改圖三在縣北二十里

至德鄉

舊里八信義下浦遵禮社塘長坦金源從善待聘

三都

舊圖四今改圖三在縣東十里 七都 舊圖六今改圖五在縣東十五里 十八

都

圖二在縣東二十里 十九都 圖四在縣東南二十五里 三十五都 舊圖五今改圖三在縣東南四十里

改圖

親仁鄉

舊里二永甯安樂

九都

圖四在縣西三十里 十都 圖二在縣西南二十五里

靈山鄉

舊里四信義孝 信仁政銅陽

十二都

圖二在縣西二十五里 十三都 圖一在縣南三十里 十四都 圖舊

三今改圖二在

縣南四十里 十五都 圖二在縣南五十里

善化鄉

舊里四山陽昭 教福山高樓

十六都

圖五在縣東南二十里 十七都 圖一在縣南二十里 二十都 圖舊

三今改圖二在

縣東南三十里

龍游鄉

舊里五從仁德安 尚德承業禮德

二十都

圖四在縣東北三十里 二十一都 舊圖四今改圖三 在縣東三十里

二十二都

舊圖五今改圖四 在縣東北三十里

激水鄉

舊里六招賢立功和 義文成武成神化

四都

舊圖十二今改圖八 八都 舊圖十二今改圖七 在縣東北十五里

二十三都

舊圖八今改圖五 在縣東北三十里

宣教鄉

舊里六千秋新興雙 巖移風韜光金堂

二十四都

舊圖九今改圖五 二十五都 舊圖十二今改圖七 在縣北四十里

在縣北

三十六都

圖五今改圖四 在縣東北四十里 三十七都 圖舊

清化鄉

舊里四積川昌 平宣陽平樂

龍游縣志

卷之二 輿地誌

二十六都

圖四在縣北四十里

二十七都

舊圖七今改圖六在縣北四十里

二十八都

圖五在縣西北三十里

二十九都

圖三在縣西二十里

萬善鄉

舊里四敦禮豐義歸仁銅溪

三十一都

圖二在縣南五十里

三十二都

舊圖四今改圖三在縣南八十里

三十三都

舊圖四今改圖三在縣南七十里

三十四都

舊圖六今改圖四在

縣南六十里

按本邑三十八都計一百八十四圖每圖下里長十名計一千八百四十里康熙元年壬寅屆奉

旨均米分宦儒民戶因減民圖為一百五十三圖改

立新一都宦儒戶三十一圖康熙十年奉文編審

定額以田土三千畝為一里因裁去宦儒圖十圖

民圖九圖計宦儒民戶共一百六十五圖一千六

百五十里里數雖減于前其實田畝丁口通融歸

併仍符舊額非有所減也

論曰三衢皆古姑蔑地而姑蔑城則在龍邑秦時

以太末各縣至東漢獻帝初平間始析置新安即

今西安其他三邑以次遞建則三衢邑治之古未

有先於龍邑者也顧自漢以來往往瓜分幅裂而

明成化間復割邑之東界以立湯谿則彌益迫隘幅員之廣反不及西邑矣乃郡有大徵發皆西龍例視此豈先王因時制宜之道歟且自京省以達江閩者道水則自睦而至道陸則自婺而至龍適當其合車馬舟楫輻輳並進如鳥之集於林而水之鍾于澤也以視江山之專於達閩常山之專於達江者稍有間矣夫地削則勢孤途衝則力詘兩者兼之雖欲毋困不可得已覽輿地者其亦惕然動念哉

龍游縣志卷之二

海城盧燦惟庵重修

龍邱余恂岫雲纂輯

男勉汧公較閱

建置誌

土宇既啓營建乃興辨方正位揆日旤景所從來矣苟邑有井疆而無建置是曠土也何以立政龍雖褊小諸所宜建次第畢舉顧成毀有數廢興在人先事周防與踵事補葺不可忽也謹而志之使

知所必焉誌建置第二

官署

縣治前臨白蓮橋後中衙東石板街西布政分司元至正丁丑達魯花赤撒木哈兒鼎建未幾毀於兵明洪武二年知縣翟瑛重建四年知縣劉庚永樂元年知縣祝淵天順五年知縣王瓚宏治八年知縣袁文紀相繼重修嘉靖二十二年毀於火巡按御史舒汀檄知縣錢仕重建中爲正堂後爲穿堂又後爲後堂又後爲知縣宅正堂左爲幕廳又左

爲縣丞宅前爲主簿宅又前爲典史宅正堂右爲架閣庫爲耳房庫又右爲吏廨爲寅畏堂正堂前爲戒石亭東西爲六房前爲儀門儀門之外右爲獄左爲土地祠前爲大門建譙樓其上大門之外前爲白蓮橋左爲旌善亭右爲申明亭今爲馬戶廳又右爲總舖相對爲榜房嘉靖間知縣甘用世於土地祠東剏迎賓館先是白蓮橋僅濶丈餘萬厯間知縣魯崇賢始改方廣數丈知縣唐興仁又蓋撤榜房擴爲街道規模始大自崇禎末年後堂穿堂

傾毀無餘正堂亦頽敝欲側勉強支拄康熙十二年知縣許瑄以聽政之地觀瞻宜肅詳請上臺動支存庫銀百餘兩不敷復捐俸錢益之重建鼎新遴選老成才幹耆民范元會葉明祥方鳴驥方文高等十七人董其役不數月大堂告成又重建後堂一座重修幕廳三楹兩廊傾廢者悉皆補葺制度魏煥遂為一邑冠冕云

明徐復初重建縣治記曰邑當孔道舟車所至商貨所通紛總填溢元宗毀于兵延歷數載而扼于事力前政未暇及也歲癸酉二月知縣翟公瑛來視篆首均賦役去詭弊一日喟然曰百里侯牧而以民居為聽政之所得無歉于心乎遂與二

政錢公彬幕長朱景榮議會邑之長年喻以意皆樂然來工于是命叟呂自明徐文煥相是役仲焯鳩工由是煥舊為新斲石用堅陶甃畚鍤備役具舉為縣亢爽翼以吏廡肅儀有門思政有堂幕廳庖漏皆有攸處塗裝黝聖華儉中度不彌月而訖工菊月告吉公乃升堂布德昭示政令飭羣吏以守身之道豈不亦卓識也哉公政以廉稱居官訓民務先原本公歷陽人氏仲華其字也明胡森重建縣治記曰嘉靖癸卯冬火燔民廬黌宮縣治暨兩司之行署皆及盡舉其市之所走集所生殖而資者而環者皆燼為燼矣嗚呼烈哉時主簿耶宜實署縣事列其狀以營建請監察舒公汀參政江公滙憲副歐公靖郡二守陳公念胥會乃命有司閱帑藏乃程土物議遠邇量工力議既定則以耶簿董之又命邑民之能赴義有心計者俾之分護課役而縣治則方錦徐越也事甫僱功縣令錢侯仕適至乃愀然曰昔子產為政書焚室而寬與之財豈其亟役耶吾恐轉徙者相屬矣姑寬民戒

勿亟于其罷追呼省財用搏夫役救災補困不違
 日夕數浹月民乃苟完則曰邑居市肆錯矣而公
 無甯宇其何以親政以終惠吾民乎於是奏其庶
 功畚鍤于庫右幕廳東西吏舍又作重門其前而加
 穿堂左庫右幕廳東西吏舍又作重門其前而加
 麗譙于上左為土地祠右為囹圄門之外為申明
 亭為總舖諸制法故加宏侈焉凡為間七十有五
 為楹二百有三十若翼宮若司府之署不在是列
 衙宇惟令丞者得存餘亦新建始于甲辰春正月
 告成功于丙午秋九月週而覽之聽斷有所燕休
 有次賓佐幕屬咸有即宅棟宇輪奐雲凝日麗倬
 乎加舊觀矣是役也費甚鉅會于官止四百餘金
 大半錢侯處給然皆不以病民故四境晏如而百
 工就緒蓋令憂民至矣而執事左右無弗盡心有
 積聚而無浮窳故工雖鉅易集也以佚道使民雖
 勞不怨况以義從事豈有弗協者哉 清余恂重
 建縣治記曰康熙歲在癸丑漢中許侯蒞龍之二
 年刑清政簡吏畏民懷閭閻熙熙邑以無事爰有

意于興廢舉墜以邑治聽政之所旦晚就圯營建
 宜先遂白諸當道諏日度工用宏厥制財用取之
 公帑不以徵里閭出納屬之老成不以關胥吏時
 未浹旬輸與告竣見者驚以為神堂既成屬予記
 其事蓋予聞侯祝神之言矣其言曰登斯堂而動
 如傷若保之心四境又安黎庶樂業在此舉也侯
 之心仁人之心也哉國家書疆啓宇制為封域以
 百里民社寄于一人而治之治所使之聽政有堂
 蒼陽而蒞以與百姓相見于離夫豈威重是為亦
 欲其清問下民布德施政循名責實以無忝于父
 母云耳士之有塾農之有廬工之有肆皆有常室
 以居其業孜孜焉早作夜思無敢越畔踰幅而竭
 智畢能以究圖于職業之內况為民父母履南面
 之尊坐堂皇之上其居益高其思益大乎士君子
 學古入官宰制一邑仰而思天子設官之意俯
 而思小民待澤之情當必有矍然惕然不遑暇逸
 者故上棟下宇則念及于甕牖繩樞端拱深居則
 念及于析寒暑雨顧瞻左右則念及于煬竈借叢

洞開重門則念及于集思廣益登斯堂也皇皇以思真若有痼瘵之未除而襁褓之難釋者是則古之所謂如傷若保者乎侯設心若此固宜百姓之歡欣息藻而樂觀厥成也斯干之考室也先之以鳥革翬飛跂翼矢棘而後有鴻雁安宅之慶定中之作宮也先之以揆日測景樹材營室而後有靈雨桑田之駕蓋自安者安人之本也由近者及遠之階也自今以往侯登堂聽政行慶施惠黍苗膏雨之澤與是堂同其更新而百姓在侯宇下亦無不如登春臺如庇夏屋有室廬幹止之安而無風雨飄搖之患焉則是堂之為覆也大矣甯甯直侯一人攸躋攸甯永綏後祿已哉是為記

儒學去治四百步宋政和二年詔郡縣立學宮縣尉劉達元始剏尋毀於火宣和七年縣令邵洪重建紹興三年縣令李莘民建御書閣藏高宗御書孝

經夫子像十三年改明倫堂曰泮林十九年縣令

吳芑始置學田淳熙中縣令董拱建四齋存誠育德敏行

已嘉定元年縣令趙希灝易泮林為登俊堂元初

並燬至元癸未達魯花赤撒木哈兒重建為增學

田鎮守千戶周旺復建廟學至順三年達魯花赤

察兒可馬重修至正末復燬明洪武初知縣劉庚

重建景泰中知縣張惠擴地造學宮廨舍重修大

成殿天順間知縣王瓚復建櫺星門修先賢兩廡

土地祠饌堂號房又改三賢祠為鄉賢祠祀漢龍邱萇南

齊徐伯珍唐徐安貞宋呂防余端禮余燦劉章胡

大昌馬天驥呂好問十人今增祀明徐天民龔世

仰祝致和余焯余日新清余恂六人宏治十一年知縣袁文紀創

尊經閣於明倫堂後記集註性理大全易詩書春秋禮

部祀晉太末長江迨宋龍游建名宦祠于戟門左令宗澤明知縣唐荀兒張

惠四人今增祀知縣袁文紀謝珊陳欽教諭鄭秉文訓導陳文禹五人共九人嘉靖四年

知縣陳欽鼎建敬一亭三十一年燬明年知縣錢

仕重建三十四年知府楊準知縣甘用世重建文

廟四十五年知縣崔宗經移置敬一亭啓聖祠于

文廟西隅萬厯四年知縣奈杰以門垣湫隘于泮

池前翼以外垣周五十丈又建坊門三座是年鄉

宦僉事毛汝麒續置資治通鑑綱目六十冊大學

衍義補三十冊十三經註疏合一百二十冊杜氏

通典四十冊陽明年譜二冊充入尊經閣今皆萬

厯六年知縣江濯之撤去舊文昌祠新建爲閣又

於泮池前濬兩湖復西湖之舊直抵城麓十二年

知縣魯崇賢重修復于堂左右壁大書龍翔鳳翥

魚躍鳶飛八大字二十五年知縣郁德據重置祭

器仍修坊門二十九年署縣推官王學孝縣丞潘

熙文改儒學門為大魁樓張壽朋題額三十四年
 知縣吳應試重修甫肇功以觀行中廢而以堂左
 右壁八大字冒名挖刻遂沒先賢姓氏三十六年
 知縣萬廷謙修葺盡易廟廡堂齋舊朽仍于文廟
 外絡以磚垣若干丈重置祭器又于三十九年捐
 置學田一百一十二畝三分零有記有圖冊存明
 倫堂閣書樓建倉于啓聖祠左本學原有田以修
謙查出奸民葉倫造等所欺隱熟地便價置買負
郭腴由入學又復從各項節省得銀一百十九兩
零連前地價共置得郭民徐道任祝錫允等田六
十二畝九分召佃人詹倉等承佃又斷追入都視

起等侵沒資福寺田四十八畝四分零召佃人袁
 曉等承佃連前買置共該租穀一百五十五石零
 克入學宮以為課士費用兼備不時修葺而餘以
 給寒士止備文申報本道本府槩不通詳以滋後
 日動支掣肘之患
 其田至今猶存
 是年之冬教諭陳本欽於明倫
 堂重立題名扁額崇禎元年知縣劉日曦鼎新五
 十餘楹然所謂敬一亭饌堂號房學倉坊門磚垣
 舊誌有圖可考者皆為茂草文昌閣燬于崇禎末
 年大魁樓燬於順治乙未戟門兩廡啓聖殿傾圮
 於甲申乙酉之際僅存者明倫堂尊經閣西一間
 西訓導齋三間即今天東小屋五六間而已康熙

五三教諭黃濤至矢誠興復徧募士民錢穀約及千金知縣艾朝棟先後捐資七百兩有奇教諭黃濤麻捐俸薪百餘兩鄉紳內翰余恂倡輸百金有奇丁未春鳩工督理生員余忱陸長源祝之瑤余以匡徐道和余勉董漢臣葉懋良余斯艾祝敏范挺生葉乘余蔚余琛呂蹶生余復享共十六人督理者民方鳴驥范元會葉明祥曹若周余希韓葉世忠方文高方繼文祝立誠余瑞倫劉師說余京共十二人先濬泮池甃石岸次復西湖文星堤建岑樓于巽方下為巽門上祀魁星建文昌閣於甲位十九年復改造櫺星戟門垣墉完具改造大殿悉庀新材易柱以石兩廡聿新各宦鄉

賢仍翼附焉神龕木王備極華整殿後禮門義路各三間存古造道進德之式土穀神祠三楹在禮門左偏內署三楹于明倫堂右曰冷閣厨房一楹在閣後射圃久湮艾知縣清查隱佔令居民余化堯余屹玉方十五等出資助工建君子堂于西圃敬一亭址免其窮究啓聖祠棟梁既具久未竣工十二年癸丑春知縣許瑄倡輸捐俸未幾告成又于學舍號房廢地立龍山講院以補鷄鳴書院之闕斐然成鉅觀矣十九年知縣盧以文昌閣當

衢路之衝且有閣而無階梯有神而無几筵於位弗宜于制未備乃與邑紳學博捐貲擇吉復改造於良位比舊制更為崇高宏厥而學宮於是無遺

憾焉

元徐伯彪文廟記曰癸未之初余始視篆聞周侯首議興學於是書勉其成越明年春

開講于茲規模宏大視昔有加焉是歲十月侯將朝京邑之人士咸德之闔辭請予記其槩予忝職郡學累辭弗獲按信安志龍游古太末墟儒風甲於一郡自慶祿詔州縣立學則始創文宣王殿至和初縣尉鏞達元斥大之始有學毀于寇宣和七年邑令邵洪重建于縣治之西硯池鏡其前激江環其後方岑二山左右映帶高峯遠岫勢若拱揖文靖劉公以經擢掄魁忠肅余公以賦登相位樞密馬公又以策冠天下至元丙子南北混一之初不知時者焚蕩城邑延及學宮綿歷八載尚仍瓦

礫士大夫非不欲如劉如邵而奪于事勢扼于實力率莫能先之者邑士余培欲撤私成厥事又病于隘陋不足以妥意一日周侯謁殿諗于眾曰昨日之夜夫子有感吾夢其意有屬起廢之責在余余其敢不力廼相舊基乃度工費廼捐金穀縣官既捐已俸儒士隨力協助聞者響應毋敢或後孟秋與役季秋告成用鈔二千貫粟七十石毫髮無取學廩至若講堂則錢二車余培慨捐居之東偏邑教張元魁從而增之門廡齋舍工役尚駁侯又思為完備計贊其議主簿黃謙光侯名旺家世開封授武德將軍管軍千戶鎮守本邑縣官則達魯花赤探馬赤前尹曹英丞范福其簿李濟尉尹恭也常因是而為之說日人之有志于道雖不期于夢夫子而夢自見夫子人之無志于道雖欲期于夢夫子而夢不見夫子何者衣冠之士孰不願學介胄之士鮮能知慕夫子而志之所之雖無夫子猶有夫子又豈待夢哉今周侯一旦輕軍旅而重

俎豆後鞍馬而先詩書此蓋本心自有之夫子故
 不與夫子期而自不能不見于夢寢非信道之篤
 任道之重疇克爾耶彼經生學子身遊聖人之門
 脫遇事變謂吾道迂緩不切而興學非所先務視
 周侯能無愧乎昔道之不行孔子深省默察矣不然夫子之
 之將行周侯乃夢孔子學苟能體周侯所以感
 夢之意則遊于斯亦宜深省默察矣不然夫子之
 夢不托諸文人而托諸武將豈無意歟豈無意歟
 徐桂蟾修儒學記曰至順三年冬憲使按部屬
 邑長可齋修理儒學明教源也以十二月庚申率
 二政李公文衝佐幕蔡公文中董公震職教洪公
 與甯釋菜于廟議其舊而新是圖明年春廣大成
 殿左右翼宇以居從祀講堂樂亭掄材易楹甍栢
 檐櫺悉使理之內燕居則備周屋文昌肅其祠外
 兩序則具六齋禮門崇其墉芹香硯池浴沂有亭
 越四月留公文亭新領學事銳意訖庸于是槐陰
 滿庭致奠告成樹石堂上屬為之詞曰愚嘗聞諸
 同年逕畷徐子之言袁得賢侯而學興婺源得茂

莘而書閣成學者登是堂踐古人之跡必取紫陽
 朱子盱江李子有關世教之記誦之今書賢大夫
 維新之績敢以聞所聞以助方來設庠序以成化
 于邑抑豈徒哉可齋公各密兒可馬受承直郎龍
 游達魯花赤兼勸農事 明商輅修儒學記曰龍
 游三衢大邑也屋室富庶人物奇偉天順庚辰進
 士王瓚廷器來尹是邑甫再葺政成民安年谷告
 豐奠謁之暇喟然嘆曰學校風化之本有司首務
 也顧棟宇頽圯若是可愆然于懷弗思所以葺而
 新之乎于是捐俸為倡同寅協贊師生勸助眾庶
 樂趨鳩工度材卜日始事將廢者修之已廢者復
 之飾以丹漆葢以陶瓦殿堂門廡齋舍舉煥然一
 新橋星門三柱若楣昔以木今易以石門之內泮
 池通溪支流水浸淫易漬茲以石甃之橋于其上
 禮門東北舊文昌祠隘陋移剏東南明厥軒豁視
 舊過之祠之後地夷衍水橫以流周圍號屋數十
 楹中設饌堂百爾所需無遺闕學者便焉經始于
 壬午之春又明年甲申冬畢工訓導雷中郭英述

興修始末徵予記之余惟合能以身率先故財無
 冗費力不濫及用能易舊為新而民弗告勞令之
 功偉矣然而藏焉修焉游焉息焉果將何以上副
 聖明教養之盛心下副賢合作興之美意哉孟子
 曰設為庠序學校以教之皆所以明人倫也人倫
 明于上小民親于下夫所謂人倫者師之所教教
 此者也弟之所學學此者也用之則行兼善天下
 者此也舍之則藏獨善其身者此也誠如是也人
 才有不底于成風俗有不歸于厚者鮮矣苟徒事
 筆墨以階進身是志于利祿者家國何賴焉噫有
 志之士幸相與勉之庸書以為記 尹直鄉賢祠
 記曰古之有道德者生教于其鄉歿則以為樂祖
 祭于瞽宗殷學也學有先賢之祠禮也禮出人心
 之本然居其鄉習其文考其德業精神寤寐如或
 見之不有崇報之禮耶龍游學舊有三賢祠祀漢
 龍邱萇南齊徐伯珍唐徐安貞者素矣時殊世遠
 學圯祠傾天順中宏農王侯瓚以名進士出牧首
 興學校其營建規制始訖歲月具見學士商輅記

成化丁亥仲秋王侯借學論三山朱君宗榮率僚
 佐生儒釋奠顧瞻慨然歎曰聖配哲像具者如此
 而七十二賢漢唐宋元從事未貌者庸非缺典歟
 王侯分俸為侶朱君割貲繼之僚屬生儒非缺典歟
 感激者又繼焉郡二守昌黎魏公安至亦趨執事
 者用心而贊成之越明年夏工既竣冠冕纓珮左
 右顯昂儼若雍容乎杏壇之上既而王侯曰祠祀
 三賢蓋循舊耳今祠興像設而茲邑賢才實盛于
 宋若飛騎尉饒州刺史呂公防左丞相余公端禮
 尚書給事中劉公章祭酒兵部尚書余公傑資政
 殿學士兼侍郎胡公大昌簽書樞密院馬公天驥
 戶部侍郎呂公好問各宦則以清節來令遷元帥
 謚忠簡者宗公澤其文章政事各當時信後世皆
 足以光賁茲土而振起斯文于無窮烏可俾其泯
 滅無聞耶于是增而合祀之此則士子崇報之美
 意也翌日訓導郭英張嗣玉書來比京請文用紀
 顛末事余惟學校王政之首治道由之以張弛柰
 何執政者往往視如郵亭傳舍曾不知子產不毀
 建置誌

鄉校為古今之美談耶王侯作興學校而于先賢
 祠尤拳拳焉朱君協力相成始終不懈二君子之
 有功於名教也豈小補哉仰止高山絃誦洋洋而
 賢才之盛于方來者庸有既耶噫後之視今亦猶
 今之視昔後之嗣政教執業來遊者其亦有感于
 斯文謝鐸修儒學記曰龍游學校燬自勝國地
 侵于民久失其制有司因陋就簡補敝葺壞蓋二
 百年于茲宏治己未六合袁君文紀未蒞龍游釋
 菜于廟顧瞻咨嗟大懼弗稱遂白諸當道遷故地
 而大更作之學之中為大成殿殿之前為兩廡廡
 之前為戟門門之外為泮池其西則為神厨為神庫為
 櫺星門門之後為尊經閣閣之前為明倫堂堂之
 宰牲所學之後為尊經閣閣之前為明倫堂堂之
 左右為齋宿所其外為東西齋齋為饌堂為倉廩為
 廨舍為號房皆煥然一新落成之日侯已遷而通
 判吾台矣顧謂予曰吾發龍游功且未終終之者
 湯令尹夏民也夫修學在有司為常事固所不必
 書惟學既成而諸生懼未知所以學願先生終有

以教之予曰嗟乎今學校之設遍天下天下之士
 盈學校其所誦讀皆六經四書之文其所講習皆
 孔孟朱程之道不可謂不知所學矣今茲邑西連
 廣信象山之學在焉東望永康龍川之學在焉而
 嶽之考亭葵之東萊皆近在咫尺今其為書具在
 其是非得失必有能辨之者苟知所以辨而釋焉
 以實用其力則所謂聖賢之學將不外是矣其他
 日聞有卓焉各世如趙清獻徐誠叟諸公復出乎
 衢則亦豈非斯學之光也哉錢仕重建儒學記
 曰嘉靖乙巳夏余奉命來尹龍邱既蒞事卜吉謁
 文廟遂周視學宮見其廟廡堂齋僅草創而尚朱
 適觀厥成也因念學校者國家尊師造士重地人
 材教化攸關是焉可不亟理之耶乃進多士而咨
 焉僉曰歲維癸卯市火烈燄延燬儒學宮墻俎豆
 俱為煨燼時署縣事者父母邱公也乃狀上諸郡
 達于省于時大巡侍御舒公汀大叅江公滙憲副
 歐公清得其狀乃胥謀允同檄郡及邑捐公帑之
 積以重建焉是故其承命而督工者父母邱公暨

我訓師陳公也又以分理經畫于下非有其人未
 易以底績復允諸生之議以義民大戶陸漢葉大
 鼎呂克順徐鐘王震舒鐸等應其役即今智併謀
 勇効力藝呈能是究是圖逾年而業已基矣顧駿
 功未易以速成而盛事亦將有待也余曰惡是安
 可緩哉乃退而謀諸邨君宜陳君槐暨僚友丞王
 君詩相與同志協力區畫財用指揮匠斲奔走羣
 執事伐石掄材量工命日以至黜聖丹艷各施其
 宜復逾年而事始竣是故中為文廟翼以兩廡祠
 有啓聖鄉賢各宦者重祀典也后為明倫堂又后
 為尊經閣旁有兩齋與夫前有櫺星戟門者崇學
 制也臥碑之石屹立于堂敬一之亭肇建于左又
 所以尊宸翰而闡皇極也至于倉庾庖厨號舍俎
 豆之類罔不百爾維新彬彬然文物備而士之藏
 修游息爰有攸止矣是役也經始于甲辰春三月
 落成于丙午秋九月其堂宇壯麗制度宏偉龍邱
 之民偕老稚而觀者罔不嘖嘖興嘆以為有嚴學
 宮跨三衢而甲兩浙矣嗚呼盛哉既而邑博邢君

守憲章君慈乃率多士謂余以崇文鉅典偉制奇
 觀不可以無紀也余乃作而言曰夫學制洵美矣
 嗟爾多士其亦知所以永厥美者乎吾聞之也學
 以至於聖人之道飾躬者也非以飾物也匪躬之
 飾而惟以飾物鳴呼其何能淑哉今夫聖人之道
 何道也人倫而已矣親之于父子也義之于君臣
 也別之于夫婦也序之于長幼也信之于朋友也
 均為天性而民之秉彝也是故道之斯為道焉得
 之斯為德焉措之斯為事焉自古帝王綏猷立極
 以平章協和者固不外此而我國家建立學校以
 化民成俗者又豈越于是哉使爾多士果能迪茲
 彝典虞爾天性勿而學焉壯而習焉不見異物而
 遷焉肆成人有德小子有造藹然禮義文明之化
 則是學也雖謂為夏之校可也殷之序可也周之
 庠可也克紹徽猷而匹休前烈其為美也不既多
 而聲光之流也又安有既哉不然觀其制嵬如也
 煥如也廓如也而夷考士行則惟知鈞利祿而忘
 節義弋聲華而弛行檢甚者殄倫敗教罔所不至

嗚呼其何能淑哉吾恐是學也其美也終亦虛文
 偉觀而已矣嗟爾多士其試思之 毛汝麒文昌
 閣記曰漢天文志斗魁戴筐六星曰文昌宮與文
 之地率象神而祠之龍學舊無是祠王川江侯來
 蒞邑事會諸士以學中改正數事上請侯曰業籌
 之矣學宮為文章之府議創建則莫文昌祠若也
 廼即表方測景拓地程物撤內外舊幹悉與更始
 為閣命筦庫出俸金以倡而公帑繼之民間毫無
 所與再越月而閣成傑出龍城之上矣侯親顏其
 前曰文昌閣閣中日聚奎樓下日三元堂以致厚
 期之意云翌日整衣潔牲率官僚師生奠文昌神
 于北而晴日升旭瑞藹騰蔚恍乎神之佑而即焉
 而精意固可想見也邑博吳君鎮李君春熙張君
 汝孝以玉川公有茲盛績不可弗識也因與庠生
 曹一恭等立石宇下謁予請記成事若日余亦邑
 人士也余惟北斗定四時繫人極而文昌用事則
 文武爵祿之司其命曰文右文事也彼握其樞我
 弛其祝恐非修文之鉅典矣攷之邑乘所載宋時

學皆有文昌祠即所傳文昌坊其故地也彼時文
 士代興聲名功業豔之史冊學士至今誦之煌煌
 乎烈矣然豪傑之生雖不係于支家語而要之岷
 起有時則地靈所萃甚明著也近觀摘華繪藻之
 士非不望日即天樞卒未有雲蒸龍變盛如有宋
 者固氣數之一塞亦主宰文運者之無其人而莫
 知加意也則茲閣之建謂之知先務也詎曰不宜
 役事甫畢即召生徒講業會文其中暇則細與評
 奇壺壺不置以故士之竊其光華者斌斌乎思以
 振起視之疇昔不啻徑庭豈其剝復之運天意與
 之更始而藉手于侯乎侯名濯之號玉川直隸建
 德人若經營省試則二尹吳若仁相方諏吉則張
 君汝孝是為記 秦鳴雷重修儒學記曰三衢古
 姑蔑之墟故稱各都所轄諸邑惟龍游縣稱最巨
 蓋太末豐安自秦漢來輒章章較著矣顧澤宮建
 置則肇于宋至和間迨我國朝益恢以大地去邑
 治財百武許南峙照臺西維澌川變幻不啻千態
 以故士生其間率多秀穎俊發與山川爭妍競麗

取高第登鼎甲者繩繩然則自昔然矣嘉靖甲辰
 燬後壞嗣是郡守楊君淮止從諸生請僅修之未
 幾復壞嗣是郡守楊君淮止從諸生請僅修之未
 廟而東西兩廡明倫堂尊經閣猶然缺焉因循既
 久日就傾頽莫有過而問者萬歷癸未魯使君下
 車伏謁畢環宮周視喟而曰根本地也頓令若斯
 有司之謂何迺緩百度布令以修學為首圖卜吉
 鳩工出帑金如千緡斥其蠹蝕圯敝者一湔而洗
 之工不告煩民不苦瘁居無何廟貌改觀下而堂
 廡齋閣門觀棟宇爛然更新焉予聞士之建業也
 猶工之築室也工當蕪穢不治則徹其故而室可
 復新士當疎慵不習則理其廢而業可復振學修
 矣而士之自修者其可已乎然澤宮徧滿寰區獨
 三衢以衍聖傳其派至今楹桷丹堊傑然卓冠一
 方譬水之行也盈盈皆是也而支流餘裔迺獨
 得之衢之所遭視他郡邑殊則諸生之產彼都景
 行沾染思翮起者視他郡邑殊則諸生之產彼都景
 右儒崇文嘉納言官議于學校諸務稍稍變易著

於令甲諸生既得所遭且生逢明盛時又有魯使
 君者銳情振作則士入而顧瞻出而淬勵甯可上
 負綦隆中孤衍聖下虛使君勤勤意哉矧諸生之
 鄉其先固有制科三上並登上第又有獨對大廷
 出入兩朝者貽榮竹帛勲業可考而鏡焉此其人
 獨異士毓雅惟在諸生之自勵耳魯使君少負雋
 才以博雅稱筮開博士膺薦剡者累遷令茲邑至
 則諸所措注獨先膠序每以暇日晉諸生親為講
 解經術課督制義諸生咸環橋倚席彬彬乎胥而
 化之他若禦旱揀焚弛力薄征御煩苛屏耳目開
 諸堰以時灌溉省供億以阜民生詰誅連以弭羣
 盜尤時時問民間疾苦而次第展施焉政績縷縷
 即更僕未易數然特使君餘緒而茲則其大者也
 學諭戴子汝慈予甥也偕其餘緒而茲則其大者也
 翰庠生葉良相方桂祝致用曹聞禮尹邦道傳中
 立輩不難千里謁願乞一言勒之石以垂永承予
 因戴甥知使君特稔因備書之是役也經始于甲
 申二月朔屆五月而事竣使君名崇賢字幼齊甲

子乙榜進士直隸之蕪湖人萬廷謙創置學田
 記曰龍故有學田若干往丙子于憲之詠興當事
 者斥賣移為版築諸費迄今三十餘年遂不能復
 舊額予始至龍邱觀學宮腐缺黷黑漫漶傾欹而
 計無所出即時時命葺理之率因陋踵敝不能及
 歲月以外予既承乏五年于此輒捐俸若干縉置
 田若干畝歲入粟若干款記另載別碑異時齋祠
 俎豆瓦墁礮斨之類咸原本予意圮者補廢者興
 而諸生之茂明異等及貧甚弗克自振令得稍稍
 分給其中其籍藏之縣其斟酌出入則付之博士
 先生之掌篆者予非敢謂完美足告成事存予意
 而已自古有國家者靡不以植學造士為首事漢
 興立大學設博士郡國舉孝廉歲增置廣厲學宮
 弟子唐或置或不置而有宋慶厯間始詔天下郡
 邑大建學校然遼遠僻固猶不能學僅廟祭孔子
 蓋至我明而蔑弗學者矣可謂千古一時然歲久
 或以為徒文具無實繫而頽圯相屬夫郊關市門
 之弗警破梁道路之弗飭識者每以詹國家之存

亡治亂焉矧菁莪棫樸將國之命脈民之生死于
 是乎在而坐觀其腐缺黷黑漫漶傾欹有司者是
 安得晏然不一再計慮哉夫蜀地僻陋有蠻夷風
 文翁一誘進之至今文雅等齊魯司馬王楊彬彬
 鼓蘭風而唱郢雪則文翁實作之始劉梁舉孝廉
 除新城長諄諄語縣人吾邑雖小猶有社稷苟赴
 期會理文墨豈本志乎乃大作講舍延生徒朝夕
 執經身往督課殿最之儒化大行世稱其教比于
 文翁焉予既雅慕往蹟恒欣然庶幾得當一二而
 自領龍之符來遂妄意政令教化行次第錯布而
 胸臆約結無奇自顧惘惘更不暇一御繩墨以外
 若文翁之減少府用度買刀布蜀物齋計吏以遺
 博士未能也為除更繇高者補郡縣吏次為孝弟
 力田未能也常選學官童子使在便座受事每行
 縣益從學官諸生明經飭行者與俱使吏民見而
 榮之未能也凡此一未能行則梁所稱期會文墨
 吏而巳豈古今異時殊勢而然耶將吏實拘謗不
 能于格外有所張設然也吾既準古昔百不能得

音源賦詩
姑呂識予之意于此雖然以予之無似一日免罪
事其青衿之屬時居遊而聳瞻嚮廣緝周浹範圍
鼓舞遂蒸蒸齒于浙之望國則予請以此為餼羊
焉因悉次其梗槩鑄之左方用紀其歲月云
本欽學田圖冊序曰萬侯置學田若干晦記之若
數若款識之碑矣已復念公田易敝世久易忘焉
得人跡之而戶提之也乃履畝豎標臚至列額舊
業何人斯新佃何人斯備載成冊付之剗劂摹散
生儒板藏官舍欽反覆閱之歎曰侯何慮之深計
之周也蓋侯之言曰今之長士者往往傳舍其官
學宮小圯不飭至極弊漉又輒釀歛勸施若蘭若
兜率然則坐小飭之貲詘也吾為之置常稔田歲
節其入博士解中每俾緡在手小圯則小葺時圯
則時葺不猶愈于極敝漉而斂會聿新之為功也
且而諸生非國家所造以竣異日用者乎俊髦既
以餼之館舍而貧不能自餼者俯仰無聊而責其

高自矜束長新而不敝必不得之數也田之入可
以贍借光布席者可以昭造士之旨為諸士勸可
以季中都會諸士可以差次肅賞為諸士激勵磨
鈍倘所謂不匱之術耶侯之言如此欽因是而益
有感焉國家甲令儲峙無所不周獨于先聖廟垣
無常飾供錢聖祖豈不慮及于此蓋以文墨吏皆
從此出睹廟典思無煩經制乃龍邱夙有學田軍
與斥為版築費則何也夫子權變去兵去食而不
去信今為築城廢則不明乎聖祖右文微意矣雖
然士必溫飽而後令毅則冷糜非第一流之資而
王石子弟將彬彬其文武乎勉旃多士侯之
作爾者至矣無文猶與何嘗以此限爾也若夫念
收入之未廣益式擴而增置之後來諒必有感發
于茲舉者清余恂重建儒學記曰吾邑學宮創
自宋政和二年厥後興廢不一今之所承則明嘉
靖間重建者距今百餘年所雖中間小有葺治率
支榷一時未遑更制歲久就圯半為茂草惟文廟
僅存覆壓是懼康熙庚子圍川艾公分符吾邑釋

奠之頃中心愀然以未得所托濡滯有待會丙午
 橋李黃公來秉教鐸毅然以興復為己任啓之艾
 公意適胎合于是相與同心協謀共圖經始艾公
 捐發公帑繩繩相繼有可區畫靡不殫盡黃公則
 悉修脯所入佐以勸募土木百需親自綜理復舉
 弟子員之賢且能者耆老之有心計者商摧指授
 其襄厥役以戊申之夏版築伊肇庚戌之冬丹雘
 告成備考厥制先聖大成殿其易材而更建者也
 東西二廡賢宦二祠以逮戟門三楹其闢荆榛灌
 莽而啓疆者也尊經之閣明倫之堂其垂毀而中
 葺者也啟聖之宮文昌之閣后土之祠其相方定
 位而改卜者也學門為岑樓學署為冷閣學之中
 堂為小草堂其踵舊制而顏以新名者也文星以
 為堤印心以為臺內外二湖以為池沼其餘力及
 之者也于是學之內殿閣巋然廊廡翼然堂宇齋
 舍井井然學之外泮水泓然長堤亘然芙蓉桃李
 燦爛然四方遠近觀者無不嘖嘖誦二公之德願
 二公之意豈徒飾觀美博聲譽為名高二公爾哉亦

欲邑之人蒸蒸然共興起于學以無負泮宮之設
 焉耳今之言興學者其說有二其卑者以地氣幸
 新人文斯茂茅茹彙征科第自此益盛而高者則
 以為學校之設不因科第務在磨礪道德淬厲仁
 義以共勉為聖賢此二說者非相反而實相因予
 嘗謂學聖賢者不必不資科第登科第者不可不
 法聖賢昔夫子設教洙泗修身明道而用世之意
 未嘗稍忘老安少懷中心志之鞅環列國席不暇
 煖其在及門亦有知爾何以之詢蓋倦倦欲二三
 子出而有為也中都之宰司寇之攝欲為東周得
 位而喜被其化者忠信貞順至于道不拾遺雖大
 業未究而四方諸侯咸來取則且競欲致地以親
 于魯藉令夫子懷寶韞玉無所試用于當日則用
 舍行藏之道不全而後世亦無由仰其過化存神
 之盛矣三代而下士之欲用世者非科第無由自
 達士不得科第則飭身修行守志樂道僅可以淑
 一身化一鄉而不能以及諸一世若尊王庇民之
 業移風易俗之效不能不藉科第為先資而或者

誦讀之時志期華無仕進之日慮切身家持祿養
 交竊位希寵碌碌無所表見苟如是則科第一途
 誠為有志聖賢者所鄙棄而不屑取嗚乎今之所
 謂學宮猶是瞽宗米廩之制也所登之堂猶是鐘
 鼓管絃之澤也所肄之教猶是詩書羽籥之文也
 所陳之禮猶是俎豆簠簋之器也士終日周旋揖
 讓其間而不以聖賢為準的誦法之謂何此無他
 則以聖賢與科第二者歧而視之之過也吾邑科
 第以宋為極盛明稍不逮然先輩之仕于朝者率
 皆砥礪名節進退不苟以忠正廉潔為高以脂韋
 滑梯為耻高山景行其則不遠此皆吾邑之以科
 第為聖賢者也士入于學宮瞻夫子之堂思夫子
 之教藉朝廷一日之爵位榮寵以發抒其匡時濟
 世之猷使夫百世而下謂今日所建之學聖賢由
 是科第由是載諸邑乘登諸國史德業爛然以垂
 不朽斯無負二公今日之盛心乎若徒紀歲月書
 姓名告成事而已非二公所以興學之意并非所
 以命記之意也 黃濤重建啓聖祠記日褒功者

必原其始考德者必本其先教天下以不忘所自
 也若云醴泉無源芝草無根豈篤論哉唐虞夏殷
 周皆神明之裔至聖先師孔子系出二微古之有
 天下者列聖代興各享其宗廟禘祫之祀易姓則
 止獨孔子廟貌徧天下血食世世不絕善乎昌黎
 韓氏之言曰自天子至郡邑守長通得祀而徧天
 下者惟社稷與孔子社祭土稷祭穀勾龍與棄乃
 其佐勾龍棄以功孔子以德自古有以功德得其
 位者不得常祀勾龍棄孔子皆不得位而得常祀
 其祀事又不如孔子之盛所謂其賢過于堯舜遠
 者非歟韓子之言如此然堯舜之功與德集成于
 大禹後世頌曰神禹禹不得專祀常祀而祭法載
 夏后氏禘黃帝而郊鯀大禹修九載之績能尊其
 父郊而配天而不得常祀于天下孔子之德修堯
 舜禹之道孟子宗孔氏其功且不在禹下况尼邱
 之克家豈不及有姒之幹蠱而漢唐以上叔梁氏
 未聞追祀于學宮于原始本先之義庸有當乎宋
 太中祥符元年真宗封泰山登孔堂遣官分奠啓

聖之祀實助諸此迨元文宗至順二年加封啓聖王亦未有專祠也明世宗嘉靖九年令京省學較通建啓聖祠以先賢顏無繇曾點孔鯉孟子父激公宜配享堂上宋儒程珦朱松蔡元定從祀兩廡神宗萬曆二十二年允楚撫郭惟賢請增周輔成爲四迄今遵之披龍游舊誌祠址在大成殿左再遷于右兵燹游臻階礎湮沒濤丙午夏蒞職募建不辭寒暑殿廡門序重觀鉅麗丁未始事庚戌垂成值邑侯艾鼎望朝棟內擢去輟作二載許侯繼任之次年釋業數四慨然許啓聖祠之未脩也分俸率屬襄力竣工癸丑以垣楹完好乃得進諸生而輸以褒功原始考德本先之大義焉先是春秋上丁至祭敬諭先奉啓聖祠本主祀于明倫堂南面撤俎而陪邑宰祭先師于大殿子雖齊聖不先父食禮也然玩襄是沿數十年于茲專祠旣成祿將肅穆矣若夫周程朱蔡兩廡未具附祀一堂在所闕如濤力竭矣以俟君子艾侯爵里詳儒學碑記許侯名瑄字巖思號虞符己亥進士陝西漢中

府城固縣人 楊昶重修學宮記曰史氏記一代人才所關治亂之數者莫賢守宰若而宰先親民後世循良稱極盛矣皆有將相才助績炳于當時後世想聞其風度致君澤民無二道也若我邑侯惟菴盧公之治龍重廉耻敦禮義使人知孝力田有古大臣風利於民者無不爲也學校尤加意焉吾庠創基于宋代有文章節義自康熙六年艾余兩公增修而後廟與雖新明倫堂歲久蠹壞文昌閣當路之衢有椽桷而無几筵公下車身在行間未遑制度今方閒暇月課士于庠徘徊瞻眺意有所屬已庀材木矣復慨然曰是堂之垂不治將地有司者之責也乃捐橐金如于急命鳩工未幾而霖雨積月垣墉盡塌斯堂巍然獨新公之誠心若有感于神明者邑人士因請更巽門之庫反者遷神之位于其上舉三善脩焉夫物之興廢有時非其人不能行是役也伊誰之力哉微公莫爲之先微余公沂公莫爲之後而兩學博先生又皆懼欣踴躍進諸生之賢者而與謀遠邇胥悅不日告

成登斯堂也規謨宏遠甲于諸郡多士蔚興在斯
舉矣嗚呼公之潔已愛民儉於自奉非有餘于財
者而為所難為期於必成蓋以寔心為政才識又
濟之百廢具舉勒諸貞珉者不一而足類宮其至
重者也余荷公好樂其事之成而為之記惜其宦
遊之遠而未逢其盛後之聞其風者莫不知吾龍
邱有賢宰若盧侯者天下事奚不可為也公諱燦
字孟輝遼東海城人有軍功詳見別記

察院原為按察司在縣治西正統五年知縣朱光顯
建嘉靖念一年燬明年知縣錢仕重建今改察院
布政分司舊在靈耀寺東宏治八年知縣袁文紀以
龍邱驛廢撤材改建于縣治西今廢其址尚存
府館在靈耀寺東知縣袁文紀建歲久傾廢知縣郁

德據移義倉于其上以官廳為鄉約所崇禎年間
知縣黃大鵬移東華預備倉材料入城改為明德
倉康熙年間知縣艾朝棟權移驛丞居之

湖鎮公館在縣東三十里萬厯七年知府陳澗檄知

縣江濯之建今廢

明毛汝麒湖鎮公館記曰湖鎮

巡警之所而非為行旅出途設也以故至其地者
多寄宿之艱難焉寺復頽圯而材舍寥寥不數椽
甚非所以懷柔遠人而肅官居之體統也吾衢太
府虹洲陳公一日行部適茲土旁皇四顧嘆曰茲
非吾守土者事耶遂檄縣令王川江侯度地聚材
鳩匠庀工而總其事于二尹吳君仁不越月而館
舍告成堂宇庖湏罔不潔齊而賓至如歸矣夫君
子之為政也猶天地之甄陶萬類也洪纖高下無

不曲成于嗟育之中一有不得其所化工歉矣為政君子務其近者大者而于其遠者小者罔究心焉固非政之全體即于天地不相侖矣公之蒞衢也端矩肅範立綱陳紀左右近習不少假借士夫民庶咸沐慈仁其于近且大者可謂殫厥心矣止宿旅次創制肇建聿為經久之圖又何嘗忽畧于其遠且小者耶今之守即古之侯也諸侯巡行以勤補助而民用休洽使巡行之政迄今尚存則公身之所至而心即通焉心之所通而政即行焉萬民熙熙得所不將與天地之嗟育萬類等耶賓旅懷惠又不足言公名濶號虹洲湖廣零陵人由戊辰進士江侯名濯之直隸建德人吳君江西萍鄉人

安仁公館在縣西四十里嘉靖四十一年知府楊準

檄縣民戴表建其地屬西安今廢

亭步水馬驛在縣北五里明初建天順間知縣王瓚

宏治間袁文紀重修其前有鼓樓有官廳知縣甘

用世重建今廢

驛前有石堤數十丈係知縣涂杰建

稅課局在通駟橋下洪武十一年設今廢

陰陽學在縣治北洪武十七年建今廢

醫學在縣治北洪武十七年建今廢

僧會司在縣治西北靈耀寺洪武十五年建

道會司在縣治西集善宮洪武十五年建

惠民藥局在縣治西今廢

養濟院在太平門外

漏澤園向有二一在縣治東二里東華山北一在縣

治北二都今其制久廢康熙十七年知縣盧燦以

寇亂之餘遺骸未掩乃捐貲買地大作佛事遍瘞

白骨建造如釋氏普同塔其地亦在東華山麓清

際熙漏澤園記日負郭東華山望如普同一塔者
漏澤園也夫塔為佛氏菩薩及辟支阿羅漢供舍
利之所方墳圓塚並有露盤尊卑各有層級凡僧
但蕉葉火珠而已安得普而全之若夫儒者西銘
有言民吾胞物吾與良以生乎于我養死乎于我
殯脫駭舊館喪聘麥舟以暨帷蓋不棄施及犬馬
卹穀完卵心存禽鳥瘞鶴有銘掩狐有墓豈與夫
劉蛻文筆之塚賈島詩魂之祭文人好事者同日

語哉龍邑荒塚纍纍漏澤園從未有專屬獨是鼎
革以來數經兵燹甲寅尤甚閩氛煽亂亡命蠶起
焚廬舍掠子女百姓流離漂散竄伏于窮谷深箐
中猶恐寇之搜及兒啼蔽斃婦走墮胎善明哀毀
于失母伯道踉蹌而奔嗣烽礮連天殺聲震地兩
軍蹙兮生死已決血膏原野屍填城窟吊戰場之
文民不得其死者一加之大軍之後繼以凶年慘
戮之氣上干天和雨暘不若旱魃為災隼禾殺稼
空嗟懸罄仰屋無籌告糴乏玉磬之貲鄰封無泛
舟之役顛連餓殍道殣相望鵠面鳩形盡登鬼錄
生無半菽之飽歿無一棺之重以繪流亡之圖民不
得其死者二既而饑饉之餘重以繁徭閩粵未靖
軍興旁午貲糧屏屨供其征繕往來一人而兼數
役一役而數千匪兇虎而率曠野履鳥道而兼涉
滂沱溽暑嚴寒饑餐毒霧以致率挽不前轉輸無
力鞭朴飲刀威崇命賤草菅其民僵尸屬路溝中
之瘠猶作倚間之望河邊之骨還入春閨之夢悲
行路之難民不得其死者三當此大寇大役大役

死千刀兵水火天札疵癘者無筭嗟乎誰無父子
 既乏藁裡之掩終鮮兄弟復無原隰之求白骨撐
 距紛如亂麻青燐鬼火焰耀荒邱每當陰雨哭聲
 啾啾行道為之隕涕盧侯痼瘵乃心惻焉傷之關
 榛莽穿窳穴收暴骨拾殘骸鳩工畚土庀磚塗至
 一龕以成爰作佛事齋戒三晝夜吊原上之魂設
 伊蒲之席緇素頂禮合掌讚嘆咸謂我侯澤及枯
 骨仁踰西伯亦既存亡生死矣不甯惟是前此寇
 盜縱橫侯則練鄉勇詰戎兵時芻糗殲巨魁而寬
 脅從以方畧攝強兵以備印禦暴客吊死問傷給
 樽設賑出水火而登衽席雖大寇無虞而民得一
 生矣既削平禍亂又為民請命親履畝蠲拋荒禁
 胥役革現年勤步禱以祈甘雨修堰隄以興水利
 招流亡而耕作寓撫字于催科雖大祲不害而民
 荷再生矣且徵發期會減苛徭清驛置修津梁飭
 道第輪蹄絡繹賓至如歸若溺女錮婢有禁而戶
 口臻禁賭輕生有條而民命甦鴻飛安集從枕席
 過師雖大役不擾而民幸三生矣况乎廓清之後

百廢俱舉投戈講藝偃武修文者乎若乃輜軒之
 使採風所及哀我人斯亦孔之將是不可以無志
 為之銘曰我侯之仁朽骨生春掩骼埋胔惠普爰
 窀式是浮屠若坊若斧馬鬣異封北邙淨土蒿里
 藉藉一邱巋然國殤游魂楚些招焉援手劫灰苔
 侵石泐慰矣九原共登壽域化為猿鶴幻為蟲沙
 淒風蔓草蕩為空華不生不滅非阡非陌萋血模
 糊千年為碧樹碣銘德地老天荒于思于思永志
 不忘

洗冤亭在湖灣

書院

鷄鳴書院在儒學北二百步隆慶六年知縣涂杰建
 前為門中為正學堂後為穿堂又後為燕室東西

兩舍後改按察司今廢

明趙鏜鷄鳴書院記曰龍游巖邑也念東涂侯以名

進士來視邑事先德化後刑罰恂恂愷悌百廢具舉合四境而觀赫如也有客過而問曰美哉政也其洋洋乎大備也哉侯曰未也吾聞政本于道而化民必士為先慨自學道愛人之訓發于孔門而武城絃歌之聲遂為萬世論政之祖吾未之逮也而有志焉乃日造賢宮與二三子講絃歌故事顧瞻學舍逼于闔闐非所以敬業樂羣也因卜地于靈耀寺之左重岡古木環抱掩映遠望鷄鳴諸峯高聳雲端若獻秀以待者侯作而嘆曰茲可以居多士矣遂上其議于當道而以公帑之餘克其費擇義民董其役中為公堂四楹後為穿堂又後為燕室東西列號舍各十有八甬道重門周廻垣繚咸中厥度以壬申五月載工八月竣事民不知勞官不稱費于是正學之堂鷄鳴之院稱雄于龍邱矣學博李君應賜因上舍陸子大成求記于余且曰是侯所以集諸士之呻吟以致科第勛名計者

謂不可無述余曰不然孟子曰鷄鳴而起孳孳為善者舜之徒也夫舜大聖也其學心學也觀其命禹曰人心惟危道心惟微惟精惟一允執厥中先儒謂虞廷十六字實開萬世心學之源舜之所以得統於堯者得此也皋夔稷契之所以見而知之者知此也古今正學之傳又孰有踰于是乎今侯以是扁之于院將不曰正學當求諸心求心當師諸舜與將不曰諸士當鷄鳴而起孳孳危微是辨精一是圖中道是執與蓋必如是則學正學正則與舜為徒雖皋夔稷契不難到也若徒曰朝夕呻吟以取科第勛名則是利而已矣利則同歸于蹠其去舜也抑豈侯今日所命名之意哉請以是質諸侯曰茲言也學之道也政之本也以是知侯無畧于龍邑也是為記涂侯名杰字汝高南昌人

九峰書院在縣東九峰山下唐侍郎徐安貞讀書處

今廢

楓林書院在縣南四十里明督學西安方應祥集生徒會文處今廢

社學

社學在靈耀寺東隆慶四年知縣傅性敏檄義民余

邦奇建外又有三一在縣北王村一在縣東湖鎮

一在縣南靈山俱宏治壬子知縣袁文紀建今並

廢宏治舊誌載社學記曰龍游備壯縣也社學凡四一曰文昌在縣西一在王村一在靈山一在湖鎮上棟下宇彼此一矩師生有舍講義有堂庖

涵器用百爾具備惜乎為教育之地未聞盡教育之道實用不存將并其地而貼于蕪及宏治壬子

袁公製錦是邑察其故而通歷焉周覽環視考其

舊制毀者尊廢者易弗儉而苟弗侈而益既而令各間里之子無貴賤少長從便就學延師以教復進子弟父兄諭以官府設學之意坐師列弟子示以古人教學之方曰師之道在正法在禦寇在因材施教毋倦教毋擊蒙毋遺實而咀華凡弟子之職其志宜正其行宜直其學宜勤其務宜要既然而弗失弗怠循序以進漸漬以洽而已矣師弟子再拜受命公曰未也不範之規矩課之功程約之賞罰不可誠曰成童而下習幼儀誦小學日記故事書精誦事強記而上習大學誦語孟經史依仁游藝先生講解論以要義毋徒誦說要實踐也于此勤而業進者賞大進者升鄉校不進戒夏楚頑罰桎梏朔望稽其文而考其行獎其賢而勵其否自聞命後先生施教弟子是則愚懲懦立而賢知益勸期月之餘閭閻秩秩成矩是由漸發以西居衢以東畔巖而南境括而北充然盎然書聲比屋而文教大行焉于茲有六年教成俗美闐闐僻壤之中藜藿膏梁之子皆有胡文定公子弟氣象澗澗雅

飭可以增廣生員矣于是四學之師相謂曰昔此民未知學遭宋令宗公澤建學設師講論經術風俗一變而賢才輩出國書特載以昭善教今日之教甯是耶宜吾儕伐石以志用垂不朽議以克合乃請記于余余惟在易有之上坤下澤其卦為臨臨者上洫下之義象曰君子以教思無窮容保民無疆公之謂也公精易凡所設施皆自易道中流出夫豈違道以干百姓之譽哉公名文紀字邦振六合人也

倉廩

永積倉在亭步驟前舊為嚴糧倉萬曆年建

明德倉在靈耀寺東崇禎年間知縣黃大鵬移東華

山預備倉材料入城改建

預備倉在縣治東二里東華山下正德中知縣袁文

紀建今廢

明王整預備倉記曰縣大夫袁文紀起

以備饑歲然多露積不垣君曰能聚之不能廩之其與幾何迺相地于東華廟之陰寬衍燥剛程物量功令民過舉者贖不能者往役罰楮抵入穀民樂趨之經始于癸丑七月迄今乙卯八月乃成為屋凡八十有一左一十二扁以六德六行右亦如之扁以地支居穀凡五萬七十有奇出納有次會計有方繚以周垣扁以石門其大要則豐收而凶散焉

邑東西南北舊有倉四東倉在縣東三十里湖鎮市

南倉在縣南四十里仁惠王廟內西倉在縣後靈

耀寺中北倉在縣北十五里王村今並廢

歸仁保義倉在湖田下儲穀備賑萬厯元年知縣涂

杰建義民陸吳捐地為基有廳屋三楹二十五年

知縣郁德據移置城中府館舊基上此倉遂廢

明王

幾歸仁保義倉記曰倉以義名公利也然往往心
殫而澤不被于民澤流而法不垂于遠則處義之
未精焉耳自耿司農立平糶之制長孫平戴胃因
之為常平義倉最稱良法今之預備即其遺也然
升合之微皆係公帑民雖懸罄展轉在庾之紅腐
不得擅發後文申請動經旬月案牘留難艱苦莫
伸其得在關領之數者不過十之四五耳又有吏
胥之需索正長之偽報廩人之扣減其得蒙實惠
之及者又不過十之三四耳則倉之設殆為贅瘤
而于民亦何利哉龍游舊有社倉四處久而湮廢
豫章涂侯蒞政之次年乃建義倉于城南貴則減
價而出賤則平價而入綜紀條畫曲盡事宜殆可

必垂之久遠者是誠為義也已朱子論社倉之弊
其說與今之義倉若有默契者吾是以知其惠利
之必可公且久也倉為廳三楹為廩六楹又後為
屋三楹以居守者前為門樓外翼以垣既三月余
過龍游請記成事乃為記之以告后人

宮庄保義倉在水北天新山儲穀備賑萬厯元年知

縣涂杰建今廢

按義倉之設即周禮遺人委積之遺意所謂縣都
之委積以待凶荒者也以其穀捐自義民故為義
倉儲之本社故又為社倉今龍邑義倉久廢前歲
辛亥大旱省城當事發價糴米自省溯流而上舳

音游縣志 卷之二
臚相接米價賴以不湧又邑中好義紳衿耆民各捐銀米有差計口授食一時幸免溝壑雖兩者之行饑民多所全活然一則借資隔壤一則取給臨時均失預備之道今義倉雖廢而遺址猶存有能毅然修復者或仍襲舊基或另卜新所募民間自行捐輸自行葺理一切收放出納官皆不與其事行之數年積貯充溢卽大稔奇荒有備無患此吾邑建置所當亟議者也邑人葉渠留心經世之學于康熙辛亥年有救荒一書切中利弊特載于此

葉渠上許邑侯救荒要畧書曰今夫布衣之士豈樂以言聞于有位哉邑中非有危急之事則不必言在上非有仁愛之長則不輕言卽事所當言上可與言而士亦旣言之矣顧言之而或以迂鄙之末議無補大猷又或謂當事之深心自有至計徒漠然輕置也亦可以不盡言何也言亦自有體也若今日者安得而不言又安得而不盡言蓋龍邑荒災已甚待哺啼饑之聲日聞于耳而邑侯之忠信慈惠又素孚乎衆志此曩者敢以一言進于左右也乃朝進書而夕拜命親承咨詢深悉同患之懷有侯如此而言猶不盡當亦士之過矣雖然歲之饑也猶人之疾也長人者之補救周卹猶醫人者之調劑護持也藥施于醫手方傳于古人士不師古而徒以無稽之言進在上者亦安用此曉曉罔益爲哉故古來荒政大約有三三者惟何日備日救日養備則于未荒之前救則于方荒之際養則于旣荒之餘顧備之原非一朝一夕之圖養之尙在已安已定之後此當預講于平時而非驟謀

乎臨事者也况夫可備之時政柄未操宜養之日
 休息有待則所當為賢侯盡言惟有救之一策
 也不觀古今救荒者乎有申請未遑發粟以濟者
 矣有司牧自出粟米以為粥食者矣有向富民勸
 分者矣抑或大興土木召募丁壯而用其人因以
 給之食也又或出金錢運穀食以行平糶而民饑
 獲濟也雖代不一人人不一事而此數端其彰明
 較著者今欲擅發公帑則司農之執法可虞盡出
 私藏則廉吏之所入有限祇諭勸分則守錢惜費
 之輩未必肯為仗義樂施之人且時詘難于舉贏
 而土木何能興廟堂方議減餉而丁壯何可募金
 粟交荒資本奚出零星分散貿易誰人而平糶又
 何以得行然則斯民終不可救而將坐視此一方
 之困乎而非也惟在有位者之誠心為民耳誠心
 為民則慮患既無不周而處事自極其當非必一
 一泥古而遵之亦時或取法于古粥可煮也米亦
 可給易虞全活之無方富可勸也商亦可通奚憂
 施濟之不廣凡所以救于方荒者有其具矣而後

加撫養于小康之月謀預備于大有之年將古來
 荒政無不悉舉異日頌循良能救荒者斷以吾侯
 為稱首是龍邑固賴吾侯而獲全吾侯亦因荒災
 而愈著也用復纂輯前聞恭進披覽以聽採擇若
 夫米粥之宜分設者幾何處大戶之可勸募者幾
 何族富商之足委任者幾何人則在有位與賢鄉
 紳之裁度區處矣蓋識近不謀遠位卑不及
 大雖盡言而究不敢妄言亦士之體然也

城郭

縣城東南阻溪三面為平原按國名記東陽記並云
 城肇始于姑蔑其地在澱水南三里東門臨薄溪
 卽今泊鯉灘城久廢惟存四門明隆慶二年按察
 副使毛綱始檄署縣事同知陳中列江山縣知縣

余一龍相度基址工費蠲軍餉三年之征得金八千餘兩徵民間米每石折銀八錢又營爐冶戶與在官田地及儒學租田通計一萬幾千餘兩明年知縣傅性敏相繼築城之延袤十里計一千幾百丈為雉堞二千八百四十有奇高一丈六尺址一丈三尺面省四之一濠深廣一丈有奇門四各有城樓東曰永安南曰歸仁西曰太平北曰嚮義外為釣橋內為官廳各三楹每門各有便門上覆以屋曰小東小南小西小北萬厯元年知縣涂杰增

繕警舖敵臺各七所女牆更加堅濶於是規制益備明末以變亂閉四小門不開 清康熙十一年知縣許瑄以城中居民耕獲樵蕪來往未便遂復開四小門如舊而四大門亦重加營葺屹若金城

云明涂杰建龍游城記曰隆慶辛未冬余奉命來吏茲土未至郭里許遙矚新城堅峭雉麗喜曰美哉乎城可用保父吾民矣尋觀片石臥道左詢之則民前所欲以紀城事者未果余曰嗟乎春秋凡城必書重民役也可無紀哉爰追紀而樹之曰龍游備之要邑也其民庶饒喜商賈土則緝學綴文取仕進其地墳衍無鉅澤修陵之阻重關復鎮之隘故穿箭牐篋剗之盜不時竊發又介金衢處徽之衝礪寇出没客兵往來卽不靖民罹其殃隆慶戊辰郡伯湯公行部至龍周覽形勝念不可

無城請諸當道罔弗俞而兵憲毛公尤毅然趣其
 成屬江山山令余公度地相宜圭景測中會召余公
 為御史而傳公適至遂申畫飭規戒成程工迺克
 底厥績焉按城以盛民也又曰城者成也言一成
 而不毀也建城盛民俾之又安惟堅則久惟龍自
 築城以來啓閉以時譏察惟謹踐更誰何實嚴警
 備穿窬賊匪剽劫之盜息礦寇暴掠客兵侵擾之
 害消稱樂國焉城之有裨于吾民也豈小哉是役
 也始戊辰冬幾月訖己巳夏幾月過一千幾百幾
 丈高一丈幾尺基一丈三尺上廣九尺女牆六尺
 三面鑿隍東阻靈源之溪門四東永安南歸仁西
 太平北嚮義樓櫓便門稱是費取于田畝工傭于
 募倩故成之尤亟云毛公名綱太平人湯公名仰
 新都人余公名一龍婺源人傅公名性敏睢州人
 董從義民則余華余權方瀛徐遠葉天祥曹叔
 元陸煌祝宗穆皆効勞于城事者也例得悉書

橋梁

白蓮橋在縣治前宋乾道中縣令林自立嘗種白蓮
 其下

通駟橋在永安門外跨靈源港長二百步宋紹興中

縣令陶定建瀆佑間邑人馬天驥重建易以石墩

凡十砑上加木板構屋五十楹于上明天順中知

縣王瓚重增石捲砑仍覆以屋凡五十有五楹嘉

靖十年知縣陳鈇二十六年知縣劉梁四十五年

主簿張蕢相繼修義民祝爾秀
余文董其事隆慶六年知縣涂

杰重修萬曆二十七年中崩四砑知縣郁德據議

修時邑人知州余邦輔議以為泊鯉灘為邑水口
 橋宜移置灘上舉人葉文懋以從百姓之便宜修
 原所一議相持知縣以水口當補而民便當從因
 定為二橋之策文懋任募通駟橋重修訖工蓋新
 屋于上三十四年燬知縣吳應試重蓋如初崇禎
 十二年復燬自是以後止架木為梁以通行旅無
 復蓋屋不數年輒朽朽輒再易云宋馬天驥通駟橋募緣疏曰伏
 以雙龍翹首十年前隨烟烟以飛騰單鳳昂頭一
 望裏間溪流而截斷行人病涉驛使艱馳編木則
 霜板歲更浮梁則春濤時漲欲登彼岸須建此橋
 願各捐青蛛流地之資更可駕玉虹插天之勢行

鯨背而風浪不驚立鰲頭而雲霄直上畫棟朝飛
 曦彩朱欄夜挹蟾暉冠蓋往來須有濟川之手段
 輪蹄絡繹豈無題柱之風流萬里東行勝槩壓錦
 江之景七星北拱清流射銀漢之津龍邱壯觀鴻
 圖遐仰明商輅通駟橋記曰通駟橋宋淳佑間
 樞密馬天驥所建石其墩而架以木行者便焉歷
 年既久風摧雨蝕木朽腐不支行者病焉天順庚
 辰宏農王君瓚以名進士出宰是邑凡利之當興
 弊之當革悉次第為之未幾政教兼行士民嚮應
 乃進者老于庭而告之日徒枉輿梁之成見于周
 禮著于軻書誠為政之先務也矧通駟為橋西通
 百粵東達兩京使車之往來王程之遲速係焉非
 但商旅之經行而已乃命善工斲石捲而成之空
 其中以醜水者十其長以丈記者八十有奇而費
 以緡記者若干工力弗與焉始事于壬午
 之秋落成于癸未之冬因為記以傳來者

按通駟橋之設以通東華各社居民往來之便相

沿已久自不可廢今以蓋橋無屋架木易圯雖城內城外仗義居民各任其半旋朽旋修不煩徧募而苟且權宜終非經久之道若及今石砥尙存為力猶易將所架橫木悉易以石上下渾成堅固如一既可省蓋屋之費而又無屢修之煩一勞永逸計無便于此者此又龍邑建置所當亟議者也

文昌橋在永安門北邑人知州余邦輔募緣四鄉得金一千有奇為墩六為砥五架木以通行者緣無覆屋架木漸圯萬曆三十六年知縣萬廷謙復行

募捐架巨木蓋屋三十餘楹上肖文昌帝君像即

以命名復于橋西建兩閣堂飛虹閣皆倚橋以為

勝僧會司僧傳性岳助田四十六畝六分零義民方文沈余正議等各捐田一十畝七分零永遠

修理之費本縣申報崇禎十三年為水所壞十六

道府批允案存工房

年知縣黃大鵬舉士民中老成耆德二十人募資

重建督工經歷余一佳生員方鳴秋余日貫毛先仍葉元祥劉敦本葉有棻方藩余酌儒耆民

方廷輔葉森然余用貢曹子俊方士駿毛光護鮑道貞余復距徐繼祥李盛卿楊惟和等

橋四百步許建百子閣為黃令祈嗣之所順治十

五年橋毀于火康熙二年知縣艾朝棟復舉仗義

者民二十人募資重建

督工葉明祥范元會方文高方鳴騷曹若周余希韓

劉師呂劉師說余一歟余之翰葉世忠余京方繼文祝立誠余文偉葉光祿齊五榮余守元董良玉

曹允而于橋之正中更起層樓矗立波心以資遠

眺又復于橋東建鐘樓一座補水口良維之闕而

樓左為堂三楹祀漢龍邱萇元趙友欽兩先生邑

人復以艾令長生王配各一水庵云十六年復燬

于火賴當事率眾撲滅僅存其半十九年知縣盧

燦捐貲倡募縣丞何應武典史李斌督理協修經

營重建并修葺其舊之腐敗者而此橋復成遂為

通邑橋梁之冠

明萬延謙建文昌橋記曰甚哉水

之阻則橋梁之而况風氣所歸吞原隰跨奔流闢

文運之興隆為扶輿之靈瑞者乎龍邑故多橋如

橋于治前者白蓮也橋於靈源者乎龍邑故多橋如

報西箭竹南風詠北後溪東北俸基俱梁焉第通

駟築而望氣用數者忌其穿心勝迤邐稍下為泊

星鄉大夫松野余公病之乃聚族而謀之募義鳩

工驅石為礮捲虛為石青龍臥其上伏牛立于岸

為丈有三十廩白金一千有奇閱六載始告成焉

無何而以無覆屋將就圯也會予來領邑事長年

三老請余臨視余見其橫截水口收挽風氣良然

節肺石之餘以充費功訖凡三十楹浮屠七級文

昌祠巋然居首費金一千有奇橋遂翼翼改觀疏

為玉虹隱如金隄月掛虛蟾星羅伏獸其東郭大

夫之築耶其京都集賢之架閣耶自是襟帶山河

連環織鎖地脈輪轉人文勃興恢恢燿燿雲蒸霞
 滂架梁之功豈日小補之哉夫文運之隆替天為
 之也文運之隆而替替而復隆也人為之也是在
 邑諸生振題柱之志砥中流之砥以無負斯橋而
 予亦得藉手以無愧于厥職庶追魏西門之譏哉
 清余恂重建文昌橋記曰邑之有文昌橋也凡
 再毀再建云先是邑東有通駟橋適當闕闕孔道
 用濟利涉而形家以橋在中流水口未固于是鄉
 先生余公松野倡議于泊鯉灘下更建一橋以資
 鎖鑰壘石為墩架木為梁橋成而未覆也萬
 麻戊申會南昌萬侯為政見而稱之復作室其上
 以蔽風雨各曰文昌橋此橋所自建也崇禎壬午
 山水驟漲南源竹木蔽空而下排蕩衝激橋為中
 毀維時建陽黃侯為政先問卿自京師移書力為
 請復且舉執友方公元駕自代黃侯傾心委任無
 所齟齬遂以甲申復建如初順治戊戌軍士有自
 北來者屯宿橋上中夜燃火自衛火烈不戢橋復
 中毀適會周川艾侯為政目擊心畫亟圖興復予

時林居亦竊贊未議公舉忠誠者老二十人効財
 宣力刻期課功以康熙己酉橋又復建如初予觀
 是橋之建不出六十年建而復毀毀而復建水火
 相禪土木再興亦云亟矣然皆迄用有成與梁坦
 然比于砥矢非賢令長之力不及此顧其時之難
 易亦有可得而言者當萬麻中葉海宇清晏垂三
 百年烟火和樂無狗吠之警吾邑至褊小家給人
 足蓋藏有餘倉廩既實好行其德而萬侯又以鷹
 擊毛鷲為治指揮叱咤民之畏之如雷電鬼神有
 呼必應惟恐或後錢幣充溢無敢核實而又承余
 公垂就之跡僅收得半之功其為時也較易迨至
 崇禎盛極而地羣盜糜沸賦役征調之煩徃徃及
 于下邑輸將供億民生日蹙黃侯易直于諒之德
 百姓信之而又付託得人而衷共事多方措畫樽
 節會計于其間亦兩浹辰而後就其為時也較難
 若至今日則更有難者吾邑自鼎革來丁壯耗于
 鋒鏑田疇竊于蒿萊戶口齒籍十不存一素封巨
 室百不存一而且水旱非時災沴叠告金貴粟賤

懋遷無策小民賣絲糶穀電勉正供尚苦不瞻遲恤其他艾侯深悉疾苦初不忍言勸募也一切經費悉皆節厨傳之餘捐金矢之積毫末織悉出自出入無閒寒暑百姓知侯之勤儉篤誠心乎為民也于是亦相與效尺寸出升斗以佐泰山土壤之萬一久之而觀感興起積累輻輳日益充斥即百姓亦有不知其然者蓋由于戴侯之德而自獻其誠不啻如頭足之相衛而臂指之相使藉令非侯則民有委而去耳夫以至鉅極重之舉非數十年之積貯不能勝任愉快者而乃得之于四盡三空釜懸瓶罄之日此其所為尤難也侯治橋之暇復于橋之左右往來審視見橋東南維勢有缺陷法當議補遂命甃石築臺表以重樓而加鐘簾焉蒲牢一振聲殷數十里樓影轟然下映江水與雙虹並峙餘力所及指顧告成侯不惟不覺其難而且恢恢游亦之易矣夫天下事難易何常之有方橋之再毀也荒基廢址明滅于寒汀衰草之中寸瓦

片石茫乎未有根抵一旦鳩工命役時詘舉羸旁觀者罔不揶揄疑且中輟甯意其蜿蜒萃律有今日之鉅觀乎侯毅然為之則竟為之矣自今以往亦惟是守望護視之宜謹修治補葺之宜時隄防捍蔽之宜固薪火蔓延之宜勸而橋遂可經久而不敗此其與肇基經始心瘁力瘁者相去何啻千里難易之數如其懸殊也夫豈前人能易其所難而後人反難其所易乎必不然矣橋既成予故備述之以告後之宰是邑者黃濤一水菴贍田記曰通都大邑肇有嘉名或以山川或以事物山川取其高且清也事物取其表而著也然總藉夫人以傳不朽龍游古姑蔑地漢龍邱先生萇隱此改今名按志稱先生居太末山中與嚴遵鍾離意友善四輔三公連辟不就更始元年任延為會稽都尉掾吏白請召萇延日龍邱生躬履仁義有伯夷原思之節都尉酒掃其門猶懼辱焉召之不可遣功曹奉謁修書記致醫藥吏相望于道歲餘萇乃詣府願得備錄延謝再三遂署謹曹祭酒尋去

隱九巖山延始終加禮後人立祠東華廟右丙午
 初夏予司邑鐸景仰高濤然茂草欲俟修建學
 宮役竣勸募里人興復之有志未逮也城之良維
 舊有津梁燬而病涉邑侯固川艾公下車伊始卽
 捐俸鳩工成以不日顏曰文昌予至業已長虹亘
 渡羣鳥飛雲矣郵傳之往來商旅之行李實拜公
 賜又建樓橋左考鐘以象龍吟鎮靈源之月窟峙
 泮壁之陽樞堪輿秘理福及科名于是薦紳先生
 青衿黃髮頌公德不替萬日如一爰築堂三楹擬
 肖公像其間以永棠懋屢請于公公曰名者實之
 賓也吾聞澤淺者譽不終我何德以堪此無已龍
 邱先生祠淪廢已久其以是為廟貌可乎抑而邑
 有趙緣督山人者鄱陽宋宗室子習天官遁甲鈐
 式諸書坐芝山酒肆遇杏林仙人石得之談元授
 丹遂棄世事獨居十年註周易著革象新書乘青
 驪往來衢婺山水間人不見其有所齎旅費未嘗
 乏絕倦游而休泊然坐亡壑城南之鷄鳴山宋景
 濂先生序之甚詳此畸人也蓋以之附諸耆老之

經營任事者皆唯諾恐後乃像設龍邱先生居中
 左緣督而公處右焉擇緇衲某主啓閉司香火復
 集資市腴田幾畝貯之菴以供饘粥慮久而有侵
 蝕隱沒之憂也為圖其疆畝而屬予記之予謂山
 川之高且清事物之表而著非人則山川事物不
 傳非有所以存其人則傳山川事物亦不克久故
 至之以方外遠于私則可久也給之以恒產久其
 生乃可存也以艾侯之德性高且清功業表而著
 父老子弟匪尋常頌饒歌禱所能誌其美而稱其
 報故于公內擢掌使將行也汲汲乎剪拜是誌謀
 遠久而樹豐碑焉於戲如有所譽其有所試可謂
 三代之直猶在斯民矣公撫字催科恩義兼行時
 以餘暇歷覽山川攷蒐事物有龍邱枕流漱石之
 風而託于吏隱有緣督談天注易之學而出以經
 邦漢宋兩賢得公而名益傳非公姓氏附兩賢曰
 不朽也召杜之績詳于余太史岫雲先生儒學碑
 文昌橋廻瀾寺暨本菴諸記中詩詠兼葭云所謂
 伊人在水一方又云在水之湄宛在水中央庵名

一水樓號三賢此物此志也矣 盧燦重修文昌
 橋疏日事有可已而不可已者如城西之靈耀寺
 事有不可已而或已者則東郭之文昌橋寺以任
 毘耶靜修無闕治理已可也坐使一佛巋然久淪
 烟濛已不可也橋以柱砥南流通濟省會不可已
 也長廊不戒寇焚虹木平鋪如故或苟可已也夫
 天下事孰不壞于苟可已而已而卒至于不可已
 而已而終莫之救半壁長虹夫獨非恤緯之明鑒
 乎余承乏茲邑日夜焦思靡不以頽尾為慮棗弓
 甫奏即令庀材補綴橋缺今廊舍雖虛非圯弗不
 可行也顧此橋自創造以來一再修于明季黃
 公一重整于三秦 艾公屈指四十年間蓋兩度
 經營矣伏莽孽妖敢借肆墟此亦厝火之微薪而
 非所語于大難削平之後也方今

命 聖天子惠殘黎嘉迺丕績特
 督院李公永鎮衢陽蠲荒蘇困鞏固苞桑凡屬
 宇下可以常享太平之樂矣爾龍之耆黎坊長更
 能好義急公築澤堰則荷插成渠復城隍則簷

宏厥持練輸力罄鼓勿勝即于此時而補葺橋廊
 之半譬左右手而携取也奚可募之喋喋為然余
 每深念龍川百里數載瘡痍未積欲少緩其
 役以需之年穀順成之日而問左善良猶日蹙蹙
 而願假予言以為券也猗歟休矣栗里醋風不圖
 其復見于子治已且余近檢縣誌授梓始知二十
 年龍邱之大政大工皆賴 余宮諭岫翁先生倡
 義率先故凡泣是土者得優游敷施以適觀厥成
 哲人云杏華表空瞻幸其長君 沂公高誼決雲
 善嗣芳躅脫驂賻麥籍甚浙東范文正之有忠宣
 王右軍之有子敬世美梓材干城名教即爾龍濟
 川之舟楫週淵之碣石也但出此疏以問之傳稱
 水涸而成梁天根見而水涸可無俟適人木鐸之
 是徇也已 是役也經始于庚申之初夏將告成于
 孟冬先識數
 言以弁諸首

百子橋在文昌橋西崇禎十六年知縣黃大鵬重建

按百子橋與文昌橋對峙相距約二百步許往時溪水自靈山港來於通駟橋下分為二支一支由泊鯉灘過文昌橋而下一支遶城外由小東門過百子橋而下至盛家碓下仍同前水合流以入澗江其時城內居民殷富而小東門一隅尤為繁盛今灘岸壅塞溪水不復遶城城中日漸蕭索而所謂百子橋者僅存空名每春雨泛漲始有水通流否則竟同枯壑矣前任知縣艾朝棟精于形家言深以此地宜加開濬曾親履其地面度工費而以

一二無知妄肆排沮遂致中輟夫水勢環抱最利城居且止需人工更無重費為力甚易而為利甚鉅乃以無知簧鼓一言債事坐失百年之利此非有明斷之君子為民興利力排妄議毅然行之未見其能復也

澗江浮橋在縣治北五里跨澗溪而渡宋宣和間夏方唐氏建今廢

馬報橋在縣東十五里

相傳扶風守徐宏戰死家人不知其所乘馬馳歸報始覺

因以嘉靖辛酉知縣甘用世重修隆慶五年知縣

涂杰重建為石五墩四廣二丈長十五丈

築溪橋在縣東二十里按舊誌偃王南走築室居此故名知縣甘用

世重建為石五墩四廣二丈長二十丈

留安橋在縣西二里

連河橋在縣西二里

坊門橋在縣西五里

九里橋在縣西九里永樂間義民余希哲建嘉靖間呂廷宣重建

平山橋在縣西二十里

箭竹橋在縣西二十五里正統八年義民方彥和建

團石橋在縣西二十里

風咏橋在縣南十里

大虹橋在縣南五十里跨桐溪有屋

廟下橋在縣南五十里跨曉溪有屋

黃浦橋在縣北二里

笄墩橋在縣北六里義民余緝建廣一丈五尺長十

丈為石四為墩三順治年間邑人守備余宏重修

普濟橋在縣北十里

後溪橋在縣北十五里嘉靖二十年耆民尹良信等

募建

俸基橋在縣東北十五里

白坑口橋在縣南六十里

停牧橋在縣北十八里

上方橋在縣北十五里

大治橋在縣北二十里

韋溪橋在縣北十里

順溪橋在縣北十里

黃堂橋在縣北二十里

塘塢橋在縣北

里

廣嗣橋在縣北

里

畫錦橋在縣北三十五里

高橋有二曰上高橋曰下高橋在縣北十里

錢橋在縣西北三十里天順間里人周廷茂建

節婦橋在縣北三十里天順間節婦黃氏故名

神僊橋在縣北四十里

兩石相倚而立相傳為異人建故名

仙跡橋在縣北三十五里洪武間里人龔子禮建有

異人過擲錢資匠氏錢跡印石猶存故名

白鶴橋在縣北四十里

圮橋在縣北三十五里

金崗橋在縣北二十里

津渡

亭步上渡

亭步中渡

亭步下渡

施家埠渡

龍興渡

盈川渡

塘坑渡

何村渡

湖鎮渡

下童渡

茆頭渡

張家埠渡

赤津渡

上塘渡

溪口渡

祖家渡

石塢渡

官潭渡

官村渡

街市

在城曰縣前曰石板街曰河西街曰西門街曰橋頭

曰橋下 以上街

在鄉曰泥灣曰靈山曰溪口曰湖鎮水之北曰鹽倉

音... 卷之二
日張家埠日白鶴橋 以上市

自永安門迤太平門為大街中為十字街其支北行者日龍頭巷日馬巷日大井巷日新路日書院巷南行者日南巷日司巷日九曲巷日城角巷由龍頭巷入日方家巷日天平巷由天平巷入日市後街日余家巷中馬巷入日錢家巷日胡家巷日市北巷自歸仁門迤嚮義門則縣前石板河西諸街支日學前巷日陸家巷日曹家巷日義井巷日叢桂里日祝家巷日濠沿日青墻後永安門外日橋

下街其支北行者日義井巷日虞家巷日大坑巷日朱家巷南行者日溪邊路通處州界日德清巷 以上各巷

舖通

總舖去縣四十步迤東三舖抵蘭谿界日永安日仁和日湖鎮迤西三舖抵西安界日澳頭日高敬日烏頭迤南五舖抵處州遂昌日東觀日舉嶺日白石日廟下日升田迤北五舖抵壽昌界日下倪日下方日前村日白鶴日 各無 南北二道以非驛路

並廢今總舖移置文昌橋西舊兩閣堂中

營寨

湖鎮巡檢司在縣東三十里湖頭鎮舊有水北巡檢

司在石佛靈山巡檢司在靈山今廢

演武教場在縣北五里

靈山教場在靈山市並有官廳帥臺萬曆元年知縣

涂杰建

豪嶺寨在治南二十二都

赤津寨在治東南二十都赤津嶺

小蓮寨在治南二十二都小蓮嶺

上塘寨在治南二十四都上塘嶺

梅嶺寨在治北五十里

以上為五嶺係龍邑控扼要地

鎮守營在治西北一百五十步崇儒坊今廢

陳村營在治西南六十里元至元中以孟祥作亂立

今廢

元人陳村營平寇記畧曰綦囊古及者益都人也以元帥守吳興平昌賊孟祥為亂始嘗

歸命得潛遁歸乃押虎縱林一吼而羣黨嚮應有

衆凡不知其幾也處以南建甯以東人皆莫能誰

何龍游當賊境上受禍先他羣縣守臣咸請之朝

王辰調囊古及討之王俊以邑兵集戲下檄督諸

軍進古及身先之士率皆爭為

效命賊披靡以降民安堵如故

坊亭

狀元坊 在儒學左

解元坊 在儒學右明宏治間知縣袁文紀立

狀元坊 縣治前宋馬天驥及第故名

叢桂坊 在縣北為宋呂防諸子立

擢桂坊 在縣東為給事中葉輔立

賓興坊 在通駟橋下為鄉進士何澄立

登瀛坊 在通駟橋下為鄉進士董偁立

梯雲坊 在治北為鄉進士虞中士立

聯璧坊 在縣北為天順己卯舉人胡琰胡節兄弟立

世芳坊 在治北為鄉進士袁宜中立
起鳳坊 在藩司前為鄉進士余默立

科第傳芳坊 在入都為鄉進士何晉何音立

進士坊 在治東為進士祝爾介陸瓚立
毛汝麒陸佐祝爾介陸瓚立

進士坊 在治西為進士陸佐立

父子進士坊 在河西街為進士祝品祝爾介立

兄弟聯芳坊 為祝爾介祝爾慶立
科第傳芳坊 為進士毛汝麒立

百歲孝子坊 在大街為孝子葉昌立

旌賢坊 在四都為童佩立
旌烈坊 在治北四里為烈女徐蓮姑立

旌節坊 在縣北五里為杜氏立
心蹟雙清坊 在治北四里

雙旌貞節坊 在文昌橋西為貞女陳氏節婦余氏建

偶然亭為知縣萬廷謙焚袍息火建

吳司理碑亭在大西門外為推官吳适建

袁太守碑亭在亭步驛前為知府袁國梓建
孫司理碑亭在文昌橋西為推官孫魯建

古蹟

姑蔑故宮舊經云城東西二百一十二步南北一百六十八步高一丈七尺厚四尺周四百七十步

唐盈川廢城在縣西三十里盈川上城址猶存有祠

祀盈川合楊燭

唐白石縣址在縣南二十五里白石山麓

隋常平倉宋為省倉在縣北紹興三十五年縣合陶

定建

尉司在縣東三百九十步

熙甯驛在縣北三十里

龍邱驛在縣治西三十步

監酒課廳在縣治北即權酒務

省庫在縣廨中

御書閣在學宮內奉宋高宗御書孝經孔子像贊疑

即尊經閣

勅書樓在縣治前

手詔亭在勅書樓左

平易堂在縣堂後

有斐亭在驛館後

政和亭在王簿廳後

激波亭在縣北五里激波巖上

洗硯池在學宮前

呂公井在縣南數百步西湖上廣四尺深五尺不加

甃砌而土不崩泉味清冽大旱不竭世傳純陽至

此以杖卓地出泉飲之故名

通駟橋義井在治東二里永安門外正德間邑人葉

茂英見負戴者渴飲溪流甚艱乃捐資鑿井于橋

東衝途水冽而甘眾稱曰義井一都義井舖因以

是名

涂公泉在治東三里東華山麓泉水甘冽萬曆三年

建龍邱祠時湧出明唐汝楫涂公泉記曰今之仕

者雖有慈仁愷悌之政而卿命

遷轉迄無甯跡民雖有顧戀繼繼忍不能捨之愛

終莫能挽其駕而為之留于是有可以寓其愛于

不忘者即而名之使一旦遷轉而不可以留而吾

顧戀繼繼之情依然不啻如在左右若周民

之于甘棠焉龍游尹涂侯于政暇閱圖經以邑之

得各由漢龍邱萇先生祀亭未嚴非所以風世乃

建置誌

下今立祠祀之庀工經始忽見祠址嘉方泉迸裂
 士民駭異凡奔走聚觀者莫不呼之為涂公泉涂
 公泉云予以為靜淵有本國泉之所以蓄而取不
 窮用不竭則泉之所以達也侯以沉潛泓演之資
 濟以淵涵深造之學流于既溢洩于持滿其見于
 政者如舍財蕪涸韓紹之康濟也館肄濯磨文翁
 之教澤也疏闕濬滄西門氏之灌溉也築輯通駟
 國僑氏之濟涉也至于龍邱先生清節湮泯歷千
 四百餘禩令茲土者曾無香火之情侯破千古之
 見發潛德之光閭境之內無論尊宿倪稚躬謁祠
 下仰瞻熟睇感慕悅喜若先世祖禰淹卹于外甃
 然來歸無不幸于見而悲其晚亦猶茲泉滄于沙
 礫混于沮洳蔽于蒼翳蓄之既極倏然流通以是
 知先生清淑之氣與侯精誠相為感孚特發于泉
 以示靈貺昭答焉耳士民沐侯德澤既沾且渥泉
 溢之異足寓其愛戴無已之情于是歸美于侯以
 名其泉比跡于召伯之甘棠其誰口不宜侯之將
 來潤飾皇猷澤施寰宇雖未可涯溪而茲邑之遭

寔侯泉達之始也廼因
 方生之請而遂為記之

夢靈泉在治北三里徐烈女祠前嘉靖中知縣萬松

始建祠常夢泉能療疾遠近民爭趨汲之故名

論曰興作之役君子重之懼其勞民也顧政體所

關民生所賴有不容已者龍邑自明季來于戈搶

攘邑治學宮以及城郭橋梁多就圯廢近賴賢父

師之力次第修復苞茂輪奐燦然改觀非復昔日

闕冗之舊而亦有未盡復者雖時值其拙未應舉

羸然亦在相其緩急權其輕重耳春秋于浚洙城

防新延廡則非之于復闕宮作泮宮修御廩則善之蓋苟利吾民君子不以爲病也易曰說以先民民忘其勞藉令上之人毛鷲鷹擊培克脔削以竭民財民將自謀之不暇遑恤其他仁人在上拊摩噢咻樽節愛養鈞金束矢不入於庭乳虎餓鳴不至於野則民所留餘不旣多乎小民以上所留餘自爲桑梓計樂事勸功惟恐或後已靈臺之咏馨鼓之章其明徵也夫

